



泰山志

人物金石

六
14-15

ル 5
3548
6



門 5
號 3548
卷 6

泰山志卷第十四

朝議大夫山東泰安府知府休寧金榮纂輯

人物志

周

柳下惠魯公族展氏名獲字季禽食邑柳下謚惠春秋左傳曰夏齊孝公伐我北鄙公使展喜犒師使受命於展禽呂氏春秋曰齊攻魯求岑鼎魯君載他鼎以往齊侯弗信而反之為非使人告魯侯曰柳下季以為是請因受之魯君請柳下季答曰君之賂以欲岑鼎也以免國也臣亦有國於此破臣之國以免君之國此臣之所難也於是魯君乃以真岑鼎往春秋繁露曰昔者魯君問於柳下惠曰我

欲攻齊何如柳下惠對曰不可退而有憂色曰吾聞之也
謀伐國者不問於仁人也此何為至於我符子曰鄰人謂
展禽曰魯聘夫子夫子三黜無憂何也禽曰春風鼓百草
敷蔚吾不知其茂秋霜降百草零落吾不知其枯枯茂非
四時之悲欣榮辱豈吾心之憂喜列女傳曰柳下既死門
人將誄之妻曰將誄夫子之德邪則二三子不如妾知之
也乃誄曰夫子之不伐兮夫子之不竭兮夫子之信誠而
與人無害兮屈柔從容不彊察兮蒙耻救民德彌大兮雖
遇三黜終不蔽兮愷悌君子未能厲兮嗟呼惜哉乃下世
兮庶幾遐年今遂逝兮嗚呼哀哉魂神泚兮夫子之
為惠兮門人從之以為誄

林放字子邱魯人故里在今治東南放城集論語林放問
禮之本子曰大哉問季氏旅於泰山子謂冉有曰女弗能

救與對曰不能子曰嗚呼曾謂泰山不如林放乎

顏希深林放故呈考孔子弟子見於家語史記者皆無
林放姓名惟蜀禮殿圖有之王應麟以為文翁所記如
林放遺伯玉申張申堂皆後人增益不可考然自成都
畫壁而後唐開元二十七年追贈放清河伯宋大中祥
符元年追封長山侯並從祀孔子廟廷所從來久遠明
嘉靖九年輔臣張璠疏言林放雖嘗問禮然家語史記
邢昺註疏朱子集註仍俱不載諸弟子之列乞祀放於魯
附祭本處鄉賢祠仍其舊爵至

詔

從之此其封爵從祀之大畧也而所稱祀於魯者則魯地
潤遠不能確指其鄉之所在以經傳註疏及國語史記
水經注括地志諸書證之大約東至沂水費縣西極魚
臺嘉祥南盡鄒嶧北抵泰山廣袤數百里皆在魯封域
之內今闕里志但言放字子邱魯人山東通志因之充
州志并佚其姓名不可謂非遺憾考泰安崇禮鄉之放

城集相傳為林放故里舊志及它書皆不載子獨謂其
可信者三宋真宗命廷臣撰孔子弟子贊主客郎中刁
術贊林放云東岳稱羨長山表封一記其所生之地一
記其所封之地其可信者一也論語會謂泰山不如林
放乎意孔子並時列國名卿大夫及魯多君子知禮者
蓋不乏人何獨取例於放當時必就其近者言之耳其
可信者二也乾隆己卯秋土人掘地得古碑字畫俱已
磨滅惟隱隱見林放及唐太和二年數字此則千已
上之物尤可據以為信予恐後人不察妄生疑議謂放
魯人不必定隸泰安境者則請更從而求其鄉之所在
焉可矣

漢

王章字仲卿泰山鉅平人也少以文學為官稍遷至諫大
夫敢直言元帝初擢為左曹中郎將與御史中丞陳咸相
善共毀中書令石顯為顯所陷咸減死髡章免官成帝立
徵章為諫大夫遷司隸校尉大臣貴戚敬憚之王尊免

代者不稱職章以選為京兆尹時帝舅大將軍王鳳輔政
章雖為鳳所舉非鳳專權不親附鳳會日有蝕之章奏封
事召見言鳳不可任用宜更選忠賢上初納受章言後不
忍退鳳章由是見疑遂為鳳所陷罪至大逆初章為諸生
學長安獨與妻居章疾病無被卧牛衣中與妻決涕泣其
妻呵怒之曰仲卿京師尊貴在朝廷人誰踰仲卿者今疾
病困危不自激叩乃反涕泣何鄙也及為京兆欲上封事
妻又止之曰人當知足獨不念牛衣涕泣時邪章曰非女
子所知也書上果下廷尉獄妻子皆收繫章死不以其罪
衆庶寃之

漢書本傳

毛莫如字少路泰山人官至常山太守有清名受田王孫

易於琅邪魯伯

漢書施
讐傳

栗豐泰山人官刺史自韓生嬰以詩授受四傳至豐

漢書
趙子

傳

冥都泰山人官丞相史初胡母生治公羊春秋授東平羸

公羸授貢禹禹授潁川堂谿惠惠授都都復與琅邪筦路

同受學於潁安樂名為筦冥之學

續文獻
通考

羊陟字嗣祖泰山梁父人也家世冠族少清直有學行舉

孝廉辟太尉李固府舉高第拜侍御史會固被誅陟以故

吏禁錮歷年復舉高第再遷冀州刺史奏案貪濁所在

然又再遷虎賁中郎將城門校尉三遷尚書令時太

顛等與宦豎相姻私公行貨賂並奏罷黜之不納

太尉劉寵司隸校尉許

益州刺史龐艾清亮在公薦舉升進帝嘉之拜河南尹計

日受俸常食乾飯茹菜禁制豪右京師憚之會黨事起免

官禁錮卒於家

後漢書
本傳

羊續字興祖泰山平陽人也祖侵司隸校尉父儒為太常

續以忠臣子孫拜郎中去官後四遷為廬江太守後揚州

黃巾賊攻舒續大破之郡界平安風賊戴風等作亂續復

擊破之生獲渠帥其餘黨輩原為貧民使就農業中平三

年江夏兵趙慈反叛殺南陽太守秦頡攻沒六縣拜續為

南陽太守嘗入郡界乃羸服間行其令長貪潔吏民畏猶

悉逆知其狀莫不震懾乃發兵擊慈斬之賊既清平乃班

宣政令侯民病利百姓歡服時尙奢麗續深疾之常敝衣
 薄食車馬贏敗府丞獻生魚受而懸於庭丞後又進之乃
 出前所懸者以杜其意靈帝欲以續爲太尉時拜三公者
 皆輸東園禮錢千萬令中使督之名爲左騶其所往輒迎
 致禮敬厚加贈賂續乃坐舉緼袍示之曰臣之所資惟斯
 而已左騶白之帝不悅故不登公位而徵爲太常未及行
 卒敕泰山守賻其家節錄後漢書本傳

王匡字公節泰山人爲人輕財好施以任俠聞袁紹辟爲

河內太守後罹董卓之難英雄記

三國

鮑信泰山平陽人少有大節沈毅有謀大將軍何進

騎都尉知董卓必爲亂勸袁紹襲卓紹畏卓不敢發乃引
 軍還鄉里時曹操起兵信乃與弟韜以兵應表信行破虜
 將軍鄒裨將軍汴水之敗信被創韜死於陣勸操規大河
 之南以待袁紹之變後表爲濟北相黃巾賊入州界操擊
 之被圍於壽張信殊死戰以救操得潰圍出信遂沒時年
 四十一雖遭亂起兵家本修儒治身至儉而厚養將士居
 無餘財士以此歸之節錄魏志本傳

鮑勛字叔業信之子魏文帝爲太子時郭夫人弟有罪勛
 爲魏郡西部都尉治之文帝爲請不從及卽位勛數直諫
 帝益忿之後以非辜下廷尉鍾繇等請之不許遂誅之勛
 內行旣修廉而能施死之日家無餘財節錄魏志本傳

高堂隆字升平泰山平陽人高堂生後少爲諸生泰山太守薛悌命爲督郵郡督與悌爭論名悌而呵之隆按劍叱曰昔魯定見侮仲尼歷階趙彈秦箏相如延臣名君義之所討也督軍失色悌驚起止之後仕魏爲散騎常侍賜爵關內侯青龍中大治殿舍及崇華殿災星孛淫雨之變隆皆據引經典上疏切諫帝曰觀隆奏使朕懼哉又請改正朔易服色殊徽號異器械帝從之遷光祿勳俾撰封禪禮儀及卒帝嘆曰夫不欲成吾事高堂生舍我亡也

節錄魏志本傳

臧霸字宜高泰山華人父戒爲縣獄掾據法不聽太守欲所私殺太守怒令收戒詣府霸年十八將客數十人要

之與父亡命東海以勇壯聞黃巾起霸從陶謙擊破之拜騎都尉曹操表霸爲瑯琊相操在兗州以徐翁毛暉爲將後叛投霸操語劉備欲霸送二人首霸曰霸所以能自立者以不爲此也願爲之辭操聞而義之後討黃巾戰孫權累立功封良成侯卒諡威子艾節錄魏志本傳孫觀字仲臺泰山人與臧霸俱起討黃巾曹操破呂布使霸招觀兄弟厚遇之征定青徐羣盜功次於霸封呂都亭侯兄康亦以功封列侯觀與操會南皮拜青州刺史從征孫權於濡須口爲流矢所中力戰不顧操勞之曰將軍被創深重而猛氣益奮不當爲國愛身乎轉振威將軍創甚卒子毓嗣累官青州刺史節錄魏志本傳

晉

羊祜字叔子續之孫世吏二千石至祜九世並以清德聞
父衛上黨太守祜蔡邕外孫景獻皇后同產弟年十二喪
父孝思過禮博學能屬文身長七尺二寸美鬚眉善談論
恂恂若儒者文帝爲大將軍辟祜未就公車徵拜中書侍
郎俄遷給事中黃門郎陳留王立賜爵關中侯邑百戶徙
秘書監封鉅平子邑六百戶武帝受禪進號中軍將軍加
散騎常侍進本爵爲侯泰始初爲尚書右僕射衛將軍都
督荊州諸軍事出鎮南郡開設庠序綏懷遠近甚得江漢
之心與吳人開布大信降者欲去聽之減戍邏之卒以墾
田八百餘頃其始至也軍無百日之糧及季年有十年之

積祜在軍輕裘緩帶身不被甲鈴閣之下侍衛者不過十
數人石城以西盡爲晉有修德信以懷柔初附慨然有吞
吳之志每與吳人交兵尅日方戰不爲掩襲計將帥有欲
進謠詐之策者輒飲以醇酒使不得言吳將鄧香掠夏口
祜募勇士生縛香旣至宥之香感其恩率部曲而降祜出
軍行吳境刈穀爲糧計所侵送絹償之每會衆江沔遊
獵常止晉地若禽獸先爲吳人所傷而後爲晉兵所得者
皆封還之於是吳人翕然悅服稱羊公不之名也祜與陸
抗相對使命交通抗稱祜之德量雖樂毅諸葛孔明不能
過抗嘗病祜饋之藥抗服之幕士多諫抗曰豈有酖人羊
叔子哉抗每告其戍曰彼專爲德我專爲暴是不戰而自

服也各保分界而已無求細利孫皓聞二境交和以詰抗
抗曰一邑一鄉不可以無信義况大國乎臣不如此是祜
專其德也咸寧初除征南大將軍開府儀同三司得專辟
召祜寢疾求人朝面陳伐吳之策帝以其病不宜常入遣
張華問其籌策疾篤舉杜預自代尋卒帝素服哭之南州
人聞之罷市哭贈侍中太傅持節如故謚曰成襄陽百姓
於峴山建碑立廟望其碑者莫不流涕因名爲墮淚碑祜
年五歲時令乳母取所弄金環乳母曰汝先無此物祜卽
詣鄰人李氏東垣桑樹中採得之主人驚曰此吾亡兒所
失物也云何持去乳母具言之李氏悲惋時人異之謂李
氏子則祜之前身也又有善相墓者言祜祖墓所有

氣若鑿之則無後祜遂鑿之相者見曰猶出折臂三公而
祜竟墮馬折臂位至公而無子太康二年以兄子篇爲鉅

平侯奉祜嗣

節錄晉書本傳

羊琇字雅舒景獻皇后之從父弟也父耽官至太常兄瑾
尙書右僕射琇少舉郡計參鎮西鍾會軍事從平蜀及會
謀反琇正言苦諫還賜爵關內侯琇涉學有智筭少與武
帝通門甚相親狎每接筵同席嘗謂帝曰若富貴見用任
領護各十年帝戲而許之初帝未立爲太子而聲論不及
弟攸文帝素重攸恒有代宗之議琇密爲武帝畫策甚有
匡救又觀察文帝爲政損益揆度應所顧問之事皆令武
帝默識之其後文帝與武帝論當世之務及人才可否武

帝答無不允由是儲位遂定及帝為撫軍命琇參軍事帝
即王位後擢琇為左衛將軍封甘露亭侯帝踐祚累遷中
護軍加散騎常侍琇典禁兵豫機密寵遇甚厚初杜預拜
鎮南將軍朝士畢賀皆連榻而坐琇與裴楷後至日杜元
凱乃復以連榻而坐客耶遂不坐而去卒贈輔國大將軍

開府儀同三司諡曰威節錄晉書本傳

胡毋輔之字彥國泰山奉高人高祖班漢執金吾父原練
習兵馬山濤稱其才堪邊任舉為太尉長史終河南令輔
之少擅高名有知人之鑒性嗜酒任縱不拘小節與王澄
王敦庾凱俱為太尉王衍所昵號曰四友澄嘗與人書曰
彥國吐佳言如鋸木屑罪罪不絕誠為後進領袖也

駕太尉掾並不就後以家貧求試守繁昌令始節酒自勵
甚有能名遷尚書郎討齊王回賜爵陰平男累轉司徒左
長史復求外出為建武將軍樂安太守避亂渡江元帝以
為安東將軍諮議祭酒遷揚武將軍湘州刺史假節到州

去幾卒子謙之節錄晉書本傳

羊曼字祖延太傅祐兄孫也父暨陽平太守曼少知名州
禮辟皆不就避難渡江元帝以為鎮東參軍轉丞相主簿
委以機密歷黃門侍郎尚書吏部郎晉陵太守以公事免
曼任達顏縱好飲酒温嶠庾亮阮放桓彝同志友善並為
中興名士時州里稱陳畱阮放為宏伯高平郗鑒為方伯
泰山胡毋輔之為達伯濟陰卞壺為裁伯陳畱蔡謨為朗

伯阮孚為誕伯劉綬為委伯而曼為黠伯凡八人號兗州八伯擬古之八俊知王敦不臣終日酣醉諷議而已故得不與其難蘇峻作亂加前將軍率文武守雲龍門王師不振或勸曼避峻曼曰朝廷破敗吾安所求生勸衆不動為峻所害峻平追贈太常子賁晉書本傳

羊鑒字景期泰山人父濟匈奴中郎將寗煒歷太僕充徐二州刺史鑒為東平太守累遷太子左衛率後討蘇峻以功封豐城縣侯徙光祿勳卒節錄晉書本傳

羊曇泰山人知名士也為舅謝安所愛重安薨後輟樂彌年行不由西州路嘗飲石頭大醉扶路唱樂不覺至州門左右白曰此西州門曇悲感以馬策扣扉誦曹子建詩曰

生存華屋處零落歸山邱慟哭而去晉書謝安傳

六朝宋

羊欣字敬元泰山南城人曾祖忱晉徐州刺史祖權黃門郎父不疑桂陽太守欣少靖默汎覽經籍尤長隸書不初為烏程令欣時年十二王獻之為吳興太守甚知愛之獻之嘗夏月入縣欣著新絹裙書寢獻之書幫數幅而去欣本工書因此彌善起家輔國參軍隆安中朝廷漸亂欣優游不復進仕會稽王世子元顯每使欣書辭不奉命元顯怒乃以為其後軍府舍人欣意貌恬然不以高卑見色論者稱焉義熙中為新安太守前後凡十三年游玩山水甚得適性轉義興太守非其好也頃之稱病篤免歸除中

散大夫弟徽字敬猷河東太守節錄宋書本傳

羊元保泰山南城人祖楷晉尚書都官郎父毅中書侍郎

元保起家楚臺太常博士劉穆之舉為高祖鎮軍參軍入

為黃門侍郎善奕碁太祖與賭郡戲勝以補宣城太守在

郡一年為廷尉數月遷尚書吏部郎御史中丞丹陽尹會

稽太守又徙吳郡太守加秩中二千石太祖以元保廉素

寡欲故願授名郡為政雖無幹績而去後常見思不營財

利處家儉薄太祖嘗曰每有好官快我未嘗不先憶羊元

保世祖卽位為金紫光祿大夫以謨敬見知大明五年遷

散騎常侍特進元保自少至老謹於祭奠四時珍新未得

薦薦者口不妄嘗卒時年九十四諡曰定兄子希字泰聞

少有才氣尚書左丞嘗疏請寬山湖之禁泰始三年出為

廣州刺史後討劉思道遇害希子崇字伯遠尚書主客郎

父葬畢不勝哀卒節錄宋書本傳

程邕之泰山人素依隨邊榮時沈攸之兵敗江陵城為張

敬兒所據邊榮為畱府司馬被報將斬之邕之抱持榮謂

敬兒曰君入人國不聞仁惠之聲而先戮義士三楚之人

寧蹈江漢而死豈肯與將軍同日而生敬兒曰求死甚易

何為不許先殺邕之然後殺榮三軍莫不垂泣曰奈何一

日殺二義士比之臧洪及陳宮云南史沈攸之傳

羊璿之字曜璠泰山人與謝靈運何長瑜荀雍文章賞會

共為山澤之游時人謂之四友終臨川內史宋書謝靈運傳

北魏

羊祉字靈祐泰山鉅平人晉太僕卿琇之六世孫也父規之宋任城令太武南討至鄒山規之降賜爵鉅平子拜鴈門太守祉性剛復好刑名為司空令輔國長史襲爵鉅平子景明初為將作都將加左軍將軍正始二年王師伐蜀以祉假節龍驤將軍益州刺史出劔閣而還後為光祿大夫加平北將軍未拜而卒贈安東將軍兗州刺史諡曰景

節錄北史本傳

羊深字文淵祉之第二子也早有風尚學涉經史為尚書駕部郎中加右軍將軍明帝行釋奠禮講孝經獨蒙引聽時論美之莊帝踐阼除太府卿又為二兗行臺深處分軍

國損益隨機亦有時譽初尔朱榮殺害朝士深第七弟侃為泰山太守遂率鄉人外招梁寇深在彭城忽得侃書慨然流涕斬使人并書表聞莊帝乃下詔褒其忠烈令還朝受敕乃歸京師除名久之除金紫光祿大夫普泰初為散騎常侍衛將軍尋兼侍中廢帝甚親待之時膠序廢替名教陵遲深乃上疏請修立國學廣延胄子帝善之出帝初除中書令及出帝入關深與樊子鶴不從齊神武起兵於兗州子鶴署深為齊州刺史天平二年正月為東魏軍所破死之子肅武定末儀同開府東閣祭酒節錄北魏書並北史本傳羊靈引祉弟也好法律京兆王愉出鎮冀州靈引為長史以相閉伺每折於愉及愉作逆先斬靈引於門事平贈平

東將軍兖州刺史諡曰威節錄北史

羊敦字元禮性尚閑素學涉書史以父靈引死王事除給

事中出為本州別駕公平正直後為廣平太守治有能名

雅性清儉屬歲饑饑家餽未至使人外尋陂澤採藕根而

食之遇有疾苦家人解衣質米以供之然其為治亦尚威

嚴朝廷以其清白賜穀一千斛絹一百匹興和初卒年五

十二吏民奔哭莫不悲慟贈衛大將軍吏部尚書兖州刺

史諡曰貞子隱武定未開府行參軍北魏書 良吏傳

劉業與泰山人四世同居並其財產家門雍睦鄉里敬異

有司申奏標於門闕北魏書 節義傳

南梁

羊侃字祖忻泰山梁父人漢南陽太守續之裔也父祉魏

侍中金紫光祿大夫侃少而瑰偉身長七尺八寸雅愛文

史博涉書記尤好左氏春秋孫吳兵法弱冠隨父在梁州

立功為別將尋以平羌功遷遣使持節征東大將軍東道

行臺領泰山太守進爵鉅平侯初其父每有南歸之意侃

至是將舉河濟以成先志以大通三年至建業授徐州刺

史并其兄默三弟忱給元皆拜刺史五年封高昌縣侯六

年出為雲麾將軍晉安太守郡內肅清頃之徵太子左衛

率大同三年車駕幸樂遊苑侃預宴時少府奏新造兩刃

稍成長丈四尺圍一尺三寸高祖因賜侃馬令試之侃執

稍上馬左右擊刺特盡其妙高祖善之又製武宴詩三十

韻以示侃侃卽席應詔高祖覽曰吾聞仁者有勇今見勇者有仁可謂鄒魯遺風矣賢不絕六年遷司徒左長史入年遷都官尙書九年出爲衡州刺史太清元年徵爲侍中二年復爲都官尙書侯景反攻東掖門侃親自距抗賊乃退加侍中軍師將軍詔送金五十兩銀萬兩絹萬疋以賞戰士侃辭不受部曲千餘人並私加賞賚初侃長子鷲爲景所獲執來城下示侃侃曰我傾宗報主猶恨不足豈復計此一子幸早殺之數日復持來侃謂鷲曰久以汝爲死猶在邪吾以身許國誓死行陣終不以言而生進退因引弓射之賊感其忠義亦不之害景遣傅士哲呼侃曰王侯王遠來問訊天子何謂閉拒不時進納尙書國書大臣

宜啟朝廷侃曰侯將軍奔亡之後歸命國家重鎮方城懸相任寄何所患苦忽致稱兵豈有人臣而至於此吾荷國重恩當真奉廟筭以掃大逆耳不能妄受浮說開門揖盜士哲又曰侯王事君盡節不爲朝廷所知正欲面啟至尊以除奸佞旣居戎旅故帶甲來朝何謂作逆侃曰聖上臨四海將五十年聰明睿哲無幽不照有何奸佞而得在朝欲飾其非寧無詭說且將軍親舉白刃以向城闕事君盡節乃若是邪平無以應乃曰在北之日久挹風猷每恨平生未獲披叙願去戎服得一相見侃爲之免胄士哲瞻望久之而去其爲北人所欽慕如此後大雨城內土山崩賊乘之突入侃令多擲火爲火城以斷其路徐於內築城賊

不能進十二月疾卒詔給東園秘器絹各五百疋錢三百萬贈侍中護軍將軍

梁書本傳

羊鵬字子鵬侃第三子隨侃臺內城陷竄於陽平侯景呼還待之甚厚及景敗鵬密圖之乃隨其東走景於松江戰敗惟餘三舸下海欲向蒙山會景倦晝寢鵬語海師此中何處有蒙山汝但聽我處分遂直向京口至胡豆洲景覺大驚問岸上人云郭元建猶在廣陵景大喜將依之鵬拔刀叱海師使向京口景欲透水鵬拔刀斫之景乃走入船中以小刀抉船鵬以稍入刺殺之世祖以鵬爲持節通直散騎常侍都督青冀二州諸軍事明威將軍青州刺史封昌國縣公食邑二千戶賜錢五百萬米五千石

千疋又領東陽太守加散騎常侍平峽中除西晉州刺史破郭元建於東關遷使持節信武將軍東晉州刺史承聖二年西魏圍江陵鵬赴援不及從王僧愔征蕭穀於嶺表閩太尉僧辯敗乃還爲侯瑱所破於豫州遇害時年二十

八梁書本傳

羊鵠仁字孝穆泰山鉅平人少驍果有膽力普通中率兄弟自魏歸國封廣晉縣侯征伐青齊間累有功績大同七年爲都督豫司淮冀殷應西豫等七州諸軍事司豫二州刺史鎮懸瓠及侯景反鵠仁率所部入援反爲景所敗臺城陷爲景所畱以爲五兵尚書鵠仁常思奮發謂所親曰吾以凡流受寵朝廷竟無報效今社稷傾危身不能死若

以此終沒有餘憤因泣下見者傷焉三年出奔江陵遇害
史臣曰羊侃鴉仁值太清之難並竭忠奉國侃則臨危不
撓鴉仁守義殞命可謂志等松筠心均鐵石古之殉節斯
其謂乎

梁書本傳

北齊

羊烈字信卿太山鉅平人也魏梁州刺史祉之弟子父瑩
字靈珍魏兗州別駕烈少通敏好讀書能言名理魏孝昌
中烈從兄侃據郡起兵歸梁烈潛知其謀與從兄廣平太
守敦馳赴洛陽告難朝廷將加厚賞烈告人云譬如斬手
全軀所存者大爾豈有幸從兄之敗以為已利乎卒無所
受弱冠州辟主簿天保中歷尚書祠部左右民郎中除平

陽太守治有能名蝗不入境勅書褒美焉遷光祿少卿武
平初除驃騎將軍義州刺史尋以老疾還鄉卒烈家傳素
業閨門修飾為世所稱一門女不再醮魏太和中於兗州
造一尼寺女寡居無子者並出家為尼咸存戒行烈弟修
有才幹大寧中卒於尚書左丞子元正武平末將作丞隋
開皇中民部侍郎卒於隴西郡贊治

齊書本傳

隋

姚義泰山人與河南董常南陽程元中山賈瓊河東賈敏
等師事文中子王通義困於蓬蒿信好義不忍捨道而干
祿通謂之曰確哉義也實行古之道難進而易退通謂義
能交或曰簡通曰所以為能也又曰廣通曰簡而能廣廣

而不濫又所以爲能也問孔庭之法曰詩曰禮而不及四
經何也義曰教之以詩則出辭氣斯遠暴慢矣約之以禮
則動容貌斯立威嚴矣度其言察其志考其行辨其德志
定則發之以春秋於是乎斷而能變德全則導之以樂於
是乎和而知節可從事則達之以書於是乎可以立制知
命則申之以易於是乎可以盡性若驟而語春秋則蕩志
輕義驟而語樂則喧德敗度驟而語書則狎法驟而語易
則玩神是以聖人知其必然故立之以宗列之以次先成
諸已然後備諸物先濟乎近然後行乎遠直其然乎通問
之日姚子得之矣

泰安縣志

唐

羊士諤泰山梁父人登貞元元年進士第累至宣歙巡

元和初拜監察御史坐論李吉甫出爲資州刺史有詩集

行世

泰安縣志

五代

姜肱乾封人高明果毅伏一世時盜起東土鄉人推以爲

令民賴以安

泰安縣志

宋

姜紘居云亭鄉以五經教授生徒鄒魯名士多從之景德

二年舉明詩學登上第仕廣川清遠縣令多惠政吏民德

焉

泰安縣志

石介字守道兗州奉符人進士及第歷鄆州南京推官篤

學有志尚樂善疾惡喜聲名遇事奮然敢為御史臺辟為
 主簿未至罷為鎮南堂書記丁父母憂耕徂徠山下葬五
 世之未葬者七十喪以易教授於家嘗人號介徂徠先生
 入為國子監直講擢太子中允直集賢院時范仲淹富弼
 韓琦杜衍同時報政歐陽修余靖王素蔡襄並為諫官介
 喜曰此盛事也歌頌吾職其可已乎作慶歷聖德詩曰衆
 賢之進如茅斯拔大姦之去如距斯脫其言大姦斥夏竦
 也詩且出孫復曰子禍始於此矣通判濮州未赴卒會徐
 州人孔直溫謀反搜其家得介書夏竦銜介甚且欲中傷
 杜衍等因言介詐死北走契丹請發棺以驗詔下京東訪
 其存亡士民數百保介已死乃免斲棺有徂徠集唐鑑

於世節錄宋史本傳

歐陽修讀徂徠集詩徂徠東魯山石子居山阿魯人之
 所瞻子與山嗟我今子其死矣東山復誰過精魄已埋
 沒文章豈能磨壽命雖不長所得固已多舊稿偶自錄
 滄溟之一贏其餘誰付與散失存幾何存之警後世古
 鑑照妖魔子生誠多難憂患靡不罹宦學三十年六經
 老研摩問胡所專心仁義邱與軻楊雄韓愈氏此外豈
 知他尤勇攻佛老奮筆如揮戈不量敵衆寡膽大身么
 庚往年遭母喪泣血走岷峨垢面跣雙足鋤犁事田坡
 至今鄉里化孝悌勤蠶禾昨者來太學青衫踏朝靴陳
 詩頌聖德厥聲續猗那羔雁聘黃晞席驚走鄰家施為
 可怪駭世俗安委蛇謗口由此起中之若飛梭上賴天
 子明不挂網者羅憶在太學年大雪如翻波生徒日盈
 門儼坐列雁鵝絃誦聒鄰里唐虞賡詠壽常續最髙弟
 簞游各名科豈止學耆師謂宜國之幡天壽反仁鄙誰
 尸此偏頗不知諷諷者又忍加詆訶聖賢要久遠毀譽
 暫誼譁生為舉世疾死也魯人嗟作詩遺魯社祠子以
 歌為

又重讀徂徠集詩我欲哭石子夜開徂徠編開編未及
 讀涕泗已漣漣勉進三四章收淚輒忻懽切切善惡戒

丁寧仁義言如聞子談論疑子立我前乃知長在世誰謂已沉泉昔也人事乖相從常苦艱今而每思子開卷子在顏我欲貴子文刻以金玉聯金可燦而銷玉可碎非堅不若書以紙六經皆紙傳但當書百本傳百以爲千或落于一世中長短無百年無窮待彼謗焰熄放此光芒懸人生一世得短未足憐惟彼不可朽名聲文行然讒誣長多幾何得短未足憐惟彼不可朽名聲文行然讒誣不須辨亦止百年間百年後來者憎愛不相緣公議然後出自然見熒妍所以忠義士恃此死不難當子病方革公至今無聖賢所以忠義士恃此死不難當子病方革謗辭正騰喧衆人皆欲殺聖主獨保全已埋猶不信僅免斲其棺此冥冥古未有每思輒長嘆我欲犯衆怒爲子記此寃下紓冥冥古未有每思輒長嘆我欲犯衆怒爲子鬼巔詢求子世家恨子兒女頑經歲不見報有辭未能子道自能久吾言豈須鏘

又讀張李二公文贈徠先生詩先生三十年東魯能使魯人皆好學其間張續與李常剖珉石得天璞大圭雖不假雕琢但未磨礱出圭角二生固是天下寶豈與先生私褚橐先生示我何矜誇手攜文編謂作得之數日未暇讀意欲百事先屏却夜歸獨坐南窗下燭青螢如熠燿病眸昏濫乍開絨燦若日星明

嚴義正質非俚古味雖淡醇不薄千年佛老賊中國禍福依憑羣黨惡拔根掘窟期必盡有勇無前力何犖乃知二子果可用非獨詞堅由志確朝廷清明天子聖陽德彙進羣陰剝大烹養賢有列鼎豈久師門共藜藿子慙職諫未能薦有酒且與先生酌

姜曠奉符人事真宗文章政事稱天下知制誥歷知興濰海寧淄五州事終度支員外郎直史館贈吏部郎中泰安縣志

姜鎬景德間以進士歷知蓬通房三州事號稱神明所至以清白聞守尙書屯田郎中致仕金紫光祿大夫泰安縣志

姜潛字至之奉符人從孫復學春秋用田况舉召試學士院爲明州錄事參軍以母思鄉求致仕熙寧中神宗聞其賢召對延和殿訪以治道對曰有堯舜二典在顧陛下致之之道何如後知陳畱縣數月青苗令下移疾去節錄宋史本傳

李穆奉符人以明經取高第歷官至尙書司勳郎同邑姜

潛稱其三建使者節四治劇郡當世名臣交章薦之蓋能

臣也子壽江陰軍判官次師彥公彥皆太廟齋郎泰安縣志

李亘字可大兗州乾封人少好學有智慮大觀二年進士

徐處仁當國擢尙書郎官建炎末金人犯淮南亘不及避

劉豫使守大名與凌唐佐謀密陳豫可取狀告於朝募卒

劉全等十餘人往返事泄遇害贈官立祠曰愍忠附宋史龔楫傳

杜默字師雄奉符人師事石介讀書徂徠山中詩文踔厲

英發氣凌一時介稱本朝八十年文人為多近世作者石

曼卿之詩歐陽永叔之文詞杜師雄之歌篇豪於一代矣

作三豪詩以送之泰安縣志

石介三豪詩曼卿豪於詩社壇高數層永叔豪於辭舉

世絕儔朋師雄歌亦豪三人宜同稱曼卿苦汨沒老死

殿中丞身雖埋黃泉詩名長如冰永叔亦連蹇病鸞方

鸞騰四海讓獨步三館最後登師雄二十三筆距獐如

鷹才格自天來辭華非學能迴顧李賀輩麤俗良可憎

玉川月蝕詩猶欲相憑凌曼卿苟不死其才堪股肱永

叔氣甚閎用之王道與師歐陽修贈徂徠先生門人杜默詩南山有鳴鳳其音和

且清鳴於有道國出則天下平杜默東土秀能吟鳳凰

聲作詩幾百篇長歌仍短行攜之入京邑欲使眾耳驚

來時上師堂再拜辭先生先生領首遣教以勿驕矜贈

之三豪篇而我濫一名杜子來訪我欲求相和鳴顧我

文字卑未足當豪英豈如子之辭鏗鏗間鏞笙淫哇俗

所樂百鳥徒嚶嚶杜子卷舌去歸衫以輕京東聚羣

盜河北點新兵饑荒與愁苦道日以盈子盍引其吭

發聲通下情上聞天子聰久使宰相聽何必九苞禽始

能瑞堯庭子詩何時作我耳久已傾願以白玉琴寫之

金

党懷英字世傑故宋太尉進十一代孫馮翊人父純睦泰安軍錄事參軍卒官妻子不能歸因家焉懷英登大定十年進士第調莒州軍事判官累除汝陰縣尹國史院編修官應奉翰林文字翰林待制兼同修國史懷英能屬文工篆籀當時稱爲第一學者宗之明昌元年再遷國子祭酒二年遷侍讀學士明年議開邊防濠堦懷英等十六人請罷其役詔從之遷翰林學士承安二年乞致仕改泰寧軍節度使明年召爲翰林學士承旨泰和元年增修遼史編修官三員詔分紀志列傳刊修官有改除者以書自隨久之致仕大安三年卒年七十八諡文獻懷英致仕後章宗詔直學士陳大任繼成遼史云節錄金史本傳

元

石珪宋徂徠先生介之裔孫也體貌魁偉倜儻不羈金貞祐南渡兵戈四起珪率少壯負險自保與滕陽陳敬宗破張都統李霸王於龜蒙山乘勝引兵入盱眙歲戊寅太祖與宋議和珪令麾下劉順入覲太祖慰勞之順還告珪心感服乃棄其妻孔氏子金山仗劍渡淮率順來歸木華黎承制授珪光祿大夫濟兗單三州兵馬都總管佩金虎符便宜從事後金棄東平珪與嚴實分據收輯濟兗沂滕單諸州癸未太祖詔曰石珪棄妻子提兵歸順戰勝攻取加授金紫光祿大夫東平兵馬都總管山東諸路都元帥餘如故秋七月珪領兵破曹州與金將鄭從宜連戰數晝夜

糧絕援兵不至軍無叛意珪臨陣馬仆被擒囚至汴金主壯其爲人誘以名爵珪不爲屈金主怒蒸殺於市其麾下立社兗州祀焉

節錄元史本傳

石天祿父珪陷金死節天祿襲爵授龍虎衛上將軍東平路元帥佩金虎符時宋將彭義斌取大名及中山天祿敗之獲義斌又敗金將武仙屢立戰功遷金紫光祿大夫都元帥鎮戍邊隅數與金人戰未嘗敗北後破考城復圍歸德從攻蘄黃功居其首時詔天祿括戶東平軍民賦稅並依天祿已括籍冊嚴實不得科收病卒子十人興祖襲千戶官武畧將軍從伐宋功在諸將上陞顯武將軍佩金虎符卒子璣嗣

節錄元史本傳

嚴謹字孝先奉符人也東平太行臺實之疏屬有將才金貞祐甲戌之亂郡城失守謹率鄉民避地徂徠之天平砦已而黃山羣盜來攻謹討而殲之東平行省蒙古忽里剛以忠勇薦遷懷遠大將軍宰清平遙領淄倅居未幾河朔諸郡無堅城總領張山杖策歸盟以腹心見委充東山招撫守傲來之天勝砦宋人于江攻天勝謹力殫被執以死子顯字子明丙戌春復從張帥拓地撫民承制擬加武略將軍授兗州泗水縣令仍充本郡軍民彈壓以疾卒榮襲父爵改泰安州司戶

泰安縣志

時珍字國寶徂徠人質幹雄偉性長厚爲鄉里所愛信金末盜起東海所在響應郡縣守令皆望風遁去民無所請

命珍率少壯守天寶寨一方帖然乙酉元兵南下嚴實開
府東平珍率衆歸之授昭勇大將軍泰定軍節度使兗州
營內觀察使元帥左監軍是歲攻益都城下超授鎮國上
將軍右副元帥鎮兗州尋改左封隴西郡開國侯食邑千
戶戊戌致仕歸子宥襲十五年孫棟襲珍生平不喜近功
小利故每事無輕肆而明識果斷往往出人意表壽七十
以疾終於家東平路萬戶總管府參議宋子貞論曰草昧
之初海內豪傑疾策詭遇以趨功名者爲不少而珍獨盤
桓後塵不失其正可謂厚德君子者矣

泰安縣志

朱珪字輔之徂陽沈邨人父玉際亡金亂率衆爲一方守
禦東平嚴武惠公給劄充都總領管轄軍民勾當珪生氣
宇不凡讀書博覽洽聞及長州軍辟舉忽覲郡王降給
劄付充泰安州等處提領掌管軍民上下帖服歷遷膠水
高密二縣尹所在興學校戢奸宄輕徭慎獄惠績廉聲遠
近稱之歷宦四十餘年以壽終子天祐充光州行軍鎮撫
沒於王事

泰安縣志

明

王圭字廷器泰安人性樸儉篤學舉永樂乙酉鄉試任山
西夏縣教諭以德學名當道薦爲御史辭不就儒官清素
四十八年以子貴封戶部員外郎年四十喪偶不復取壽
幾百歲子二牧山西鄉試第一育賜進士累官山西左布
政稱剛直清白俱爲鄉評所重

明汪子卿志

傅裕字克寬天順間舉人判真定府擢倅延安尋升知守
所至稱廉仁榆林參將郭英豪橫不法屬裕鞠其獄英以
五百金賂不受卒按以法後致仕林居絕請謁鄉評重之

明汪子
鄉志

蕭大亨字夏卿號嶽峯泰安人母夢嶽神入室而生體貌
奇備登嘉靖壬戌進士初授榆次令累遷戶部郎中駐陝
西花馬池督餉監兵以念母疏請終養辭極剴切上俞之
兼程而歸五百里外聞母訃廼披跣不食徒步日奔百餘
里居憂哀毀骨立服闋復除邊道歷任藩臬跋涉河朔關
隴間幾二十年始開府寧夏再調宣府寧夏孤懸河外戍
卒驕橫宣府爲京師項吭要害所至調度井然恩威並著

晉兵部侍郎護潞藩之國一切裁以法中官斂衽不敢恣
道路肅然尋轉右都御史總督宣大山西三鎮威信素服
邊庭人稱福神焉加太子太保兵部尚書召入累進少保
兼太子太保柱國兵刑兩部尚書致仕卒於家所著有今
古文鈔文章正宗等書行世從祀鄉賢子二和中以父廕
除後府都事累晉太僕寺少卿明達有爲卒入鄉賢協中
另有傳

泰安
縣志

李汝桂號少崖還樸其字也以字行家泰山之崖下村事
父母稱孝爲學究性命之旨以主靜謹獨爲要學者多宗
之隆慶己巳貢成均授獻縣教諭楷模多士有安定蘇湖
風及歸從遊日衆侍臯比者數百人大參甘一驥侍御馬

經綸皆造廬執弟子禮年七旬餘坐講堂談說竟日無倦容闡明太極中庸鈞深探微多前賢所未發卒年八十六侍御馮從吾題其墳曰明理學名儒還樸李先生墓所著有還樸心聲講餘錄諸書行于世泰山紀事

張異泰安下張保人篤學敦行勤勞養父母寒暑不怠父死廬墓三年母死如之由州學生卒業成均官山西布政

司檢校明汪子卿志

宋燾字繹田家泰山下萬歷辛丑進士選庶吉士改御史巡按應天因劉天緒亂上疏罷採權極言民不堪命競為盜賊語甚切至並斥時相及諸閹宦由是權貴側目不容于朝以疾歸築室泰山之麓顏其室曰青巖讀書其中數

與東林諸君子往復尋卒時年四十四崇祀鄉賢所著有

泰山紀事青巖居草行于世泰安府志

燾青巖居偶成詩解性耽閒曠依山敢靜扉方知塵事遠况與世情違月白烟蘿徑風清薜荔衣短牆垂柳綠常蔭釣魚磯

王楫字濟川一字夢符泰安人萬歷己未進士初授柘城調安邑尋遷戶部主事司餉山海關會兵變閣部及道蒙難楫獨全莊烈嘉之曰謀怨不及操守可知遷固原道升寧夏巡撫以廉介執法忤悍將遇害朝野傷之泰安縣志

蕭協中字公誦宮保大亨次子以廩授上林苑監丞晉順天府治中崇禎末致仕甲申流賊攻城將陷協中北嚮再拜投井死生平精文翰尤尚氣節蒿目時事輒扼腕歛歔

著有綠遠樓賦醞檀集泰山小史李維楨爲之序雍正四年入忠義祠

泰安縣志

國朝

王度字平子順治丙戌進士除大同知縣總兵姜瓖以城叛時總督以下官胥出迎英王家屬陷城內皆惶懼有謂宜入城者度大呼曰賊據城矣若入城是從賊也今事且急莫如馳赴陽和迎英王會兵勦賊衆意乃決閏十月而賊平擢刑部主事恤刑江南之徽寧諸郡多所平反全活甚衆累官總督倉場戶部右侍郎致仕歸年八十餘卒著有恤刑題稿泰山後石塢蓮花洞側有石刻戶部侍郎王度讀書處九字

朱孝純圖志

范惟粹字完白遜之子順治己丑進士初知政和縣後補江右新城邑多積猾號難治惟粹御以醇靜豪右斂跡四境帖然稱善俗焉年六十以疾卒於官吏民思之著有江

上草澄觀堂稿

泰安縣志

趙國麟字仁圃號拙庵其先上虞人祖瑗愛泰山之勝遂家焉國麟康熙丙戌進士由長垣知縣仕至文淵閣大學士國麟自少至老潛心力學務闡明宋五子大旨而不泥其辭尤喜啟迪後進設青巖義社於泰山之麓來學者嘗數十百人

朱孝純圖志

李之實字蕢其父乾明時樹德於鄉刺史以孝義旌其門之實篤志嗜學爲文奔放有奇氣知州張錫懌州同賀運

清皆名進士雅重之中康熙癸卯鄉試一上公車不第退而教授生徒成就人材甚夥著春秋辨疑四書存是編藏於家子九德字臯颺少年食餼有文名與王無間著黃蓮

記四卷

泰安縣志

漢僑寓

蔡邕往來依泰山羊氏積十二年

後漢書

唐

李白字太白興聖皇帝九世孫白之母夢長庚星因以命

名十歲通詩書既長隱岷山更客任城與孔巢父韓準裴

政張政明陶沔居徠山日沉飲號竹溪六逸

節錄唐書本傳一

孔巢父字弱翁孔子三十七代孫少力學隱徠山後遊

江東永王璘辟署幕府不應璘敗知名廣德中李季卿表

為左衛兵曹參軍拜湖南觀察使德宗狩奉天行在擢給

事中累上破賊方畧帝嘉納未幾兼御史大夫為魏博宣

慰使李懷光據河中帝令巢父宣慰竟遇害帝聞震悼贈

尚書左僕射諡曰忠

節錄唐書本傳

蘇源明少孤寓居徐兗工文詞有名天寶間

唐書

杜甫入哀詩弔武功蘇源明武功少也孤徒步客徐兗讀書東嶽中十載考墳典

宋

孫復字明復晉州平陽人舉進士不第退居泰山學春秋

著尊王發微十二篇大約本於陸淳而增新意石介有名

山東自介而下皆以先生事復年四十不娶李廸知其賢

以其弟之子妻之復初猶豫石介與諸弟子請曰公卿不下士久矣今丞相不以先生貧賤欲託以子宜因以成丞相之賢名復乃聽孔道輔聞復之賢就見之介執杖履立侍復左右升降拜則扶之其往謝亦然介既為學官語人曰孫先生非隱者也於是范仲淹富弼皆言復有經術宜在朝廷除秘書省校書郎國子監直講車駕幸太學賜緋衣銀魚召為通英閣祇候說書尋罷後貶處州監稅徙應天府判官未行翰林學士趙概等十餘人言復經為人師不宜使佐州縣留為直講稍遷殿中丞復與胡瑗不合在太學常相避瑗治經不如復而教養諸生過之復既病韓琦言於仁宗選書吏給紙筆命其門人祖無擇就復家得

書十五萬言錄藏秘閣

宋史本傳

附信道堂記聖賢之迹無進也無退也無毀也無譽也唯道所在而已用之則行舍之則藏孰為進孰為退哉考諸三王而不謬建諸天地而不悖質諸鬼神而無疑百世以俟聖人而不惑孰為毀孰為譽哉吾之所謂道者堯舜禹湯文武周公孔子之道也孟軻荀卿揚雄王通韓愈之道也吾學堯舜禹湯文武周公孔子之道非今之世故不知進之所以為進也退之所以為退也毀之所以為毀也譽之所以為譽也孔子孟軻荀卿揚雄王通韓愈之道進也於吾躬何所進哉其退也於吾躬何所退哉其見毀也於吾躬何所毀也其見譽也於吾躬何所譽也於吾躬何所譽哉故曰聖賢之迹無進也無退也無毀也無譽也於泰山之陽明年春堂既成以是道處是堂故命之曰信道堂云景祐五年正月三日記

石介贈孫先生詩世無伯樂不識馬眼看騏驎如鴛駘
先生今年四十四才似臯夔胡為哉泰山山下水照石
溪聲澌澌白雲堆我居其間
構茅屋先生先生歸去來

又贈孫先生詩我來南山興感悲萬物絃絃宰者誰眾
材叢阜無奇姿直轅曲輪皆所宜大木磊磊節幹奇撐
巖拄谷無處施我願天子修明堂坐朝諸侯會四夷柱
要十圍棟百尺日責匠石搜訪之千人用斧萬人拽大
根斫斷山崩欹五州追牛十縣丁載送上都天子怡般
輪駭汗工僮走有目未省曾觀窺黃帝合宮堯衢室周
制九筵虞總期聽政朝夕有攸處闔門左右咸以時天
子拱手四輔立坐致四海為雍熙不用直棄用即大短
轅曲輪
爾胡為

梅聖俞哭孫明復詩舊業居東岱中
年謁紫庭要塗無往跡至死守殘經

胡瑗字翼之其上世居陵州後為泰州如臯人先生為人

師言行而身化之使誠明者達皆愚者勵而頑傲者革故
其為法嚴而信為教久而遵師道廢久矣自景祐明道以

來學者有師惟先生暨泰山孫明復石守道三人而先生

之徒最盛歐陽修胡先生墓表

密史胡瑗與孫明復石守道講學泰山攻苦食淡終夜
不寢十年不歸得家問見有平安二字即投之澗中不
復展讀今人名其書處為投書澗云

張續字禹功李常字遵道皆濮人石介教授徂徠山中二

子負笈從遊介稱之曰禹功藏用於神得天下之幾遵道
直道而行明天下之治幾近易治近春秋二子之道其必

達矣後舉進士皆登高第泰安府志

元

許衡字仲平河內人金季兵亂避之徂徠泰山間扁其室
曰魯齋初從姚樞竇默游獲聞程朱之學遂為名儒元世

祖召為京兆提學累官集賢大學士兼國子祭酒領太史院事累遷中書左丞贈司徒諡文正節錄元史本傳

鹿森字茂之關中人隱居徂徠好老氏言晚而玩易題其所居曰貧樂巖日演易齋長清杜仁傑為之誤碑泰安府志

朝

江天嶼字山民江南淮陰人遊岱下家焉修髯古貌望之如神仙中人與學博孔貞瑄郡人趙瑗張坦諸耆宿往來石堂與祖珍和尚結生公之社詩酒徜徉號八散人性喜梅作梅花七律一百二十首淄川唐太史夢賚序之謂在孤山處士伯仲間泰安縣志
金簡字枚仲紹興人愛泰山之勝家焉以部掾為徐州

城驛丞貌偉麗瀟灑善畫山水有岱嶽邱壑圖大學士趙

公國麟題以長歌泰安縣志

趙國麟題岱嶽圖詩鶴髮老翁同余好千巖萬壑藏懷抱長臂攜來七十二峯矗立窗東青浩浩下蟠坤軸鎮地維上拂羲馭映晴昊西走崑崙勢欲連東趨溟渤影如倒九龍飛舞天門左丈人獨立吳觀表崖松不壽六月
雲洞雲未雨瀑垂縞黃峴西迴鳳翔下石經亭子水雲歸呂公王母會瑤池飛泉亂落水森森傲來揮天仙人掌露蔽虧西麓招提繞當前古樹抱樓臺山椒曲砌登山道我昔垂髫奉杖時追隨陟降酬尼禱漸長漸成山水癖時結同人事幽討穿雲醉踏青芙蓉冒雨登峯拾瑤草北窗坐對快怡神貧兒暴富饑腸飽十年不覩故人面夢中猶自記了了半人久乏濟勝具探奇選勝迹如掃一旦林前可臥遊何當縮地送神巧金子金子公不愚拍手大笑移山老

趙瑗字臨若越儒也流寓泰安與淮陰江山民曲阜孔壁六州人張方平范靖赤釋祖珍象乾等結生公之社號石

堂八散人

方望溪集并張四教碑記

周以下

春秋三子貧士傳云三子者楚之交子魯之周子齊之狂子也目覩王綱之斁思欲絕景雲表濯志溟洋乃相與居泰山之陽處環堵之室草戶不扉蓋茨不翦而高歌不輟君子謂可方之倪缺云贊曰殊方三子同道一心翹視姬邦鳳遠泰岑作幾舉色含和抱真豈謂陋棲廢厥高吟榮啟期列子云孔子遊於泰山見榮啟期鹿裘帶索鼓琴而歌問曰先生所以為樂者何也對曰吾樂甚多天生萬物惟人為貴吾得為人一樂也男尊女卑吾得為男二樂也人生有不見日月不免襁褓者吾既行年九十矣是樂也貧者士之常死者人之終處常得終尚何憂哉孔子曰善乎能自寬者也

日善乎能自寬者也

唐吳筠高士詠榮期信知止帶索無所求外物非我尚琴歌自優游三樂通至道一言醉尼邱居常以待終嘯傲復何憂

隋

徐鴻容泰山人隋末山東大水饑殍滿野李密取黎陽倉大濟之得勝兵三十餘萬鴻容獻書於密以為大眾久聚恐米盡人散師老厭戰難以成功勸密乘進取之機因士馬之銳沿東指南直向江都執取獨夫號令天下密壯其言以書招之竟不出莫知所之史

唐

范山人 見李太白集

李白送范山人歸泰山詩魯客抱白鶴別餘往泰山初行若片雲杳在青崖間高高至天門日觀近可攀雲山望不及此去何時還

泰山老人 見張文昌集

張籍泰山老人詩日觀東邊幽客住霧中藤帶亦逢迎暗修黃籙無人見深種胡麻共犬行洞裏仙家常獨往壺中靈藥自為名春泉四面連茅屋日日唯聞杵臼聲

王希夷徐州滕縣人孤貧嗜學父母終為人牧羊收傭以供葬畢隱於嵩嶽後居兗州徂徠山中好讀易及老子刺史盧齊卿就謁致禮因訪以字人之術希夷曰孔子稱已所不欲勿施於人可以終身行之矣及元宗東巡勅州縣以禮徵召至駕前年已九十六上命中書令張說訪以

道義宦官扶入宮中與語甚悅開元十四年下制曰處士王希夷絕學棄智抱一居貞久謝囂塵獨往林壑朕為封巒展禮側席旌賢賁然來思克應嘉召雖紆綺季之跡已過伏生之年宜命秩以尊儒俾全高於尚齒可朝散大夫守國子博士聽致仕還山 舊唐書

宋

秦辨泰山隱士大中祥符三年四月辛酉賜號貞素先生放還山 宋史真宗本紀

金

王若虛字從之棗城人也幼穎悟若夙昔在文字間者擢承安二年經義進士歷管城門山二縣令皆有惠政薦入

爲國史院編修官後轉延州刺史入爲直學士天興元年
哀宗走歸德明年春崔立變羣小附和請爲立建功德碑
翟奕以尙書省命召若虛爲文若虛自分必死私謂左右
司員外郎元好問曰今召我作碑不從則死作之則名節
掃地不若死之爲愈雖然我姑以理論之乃謂奕輩曰丞
相功德碑當指何事爲言奕輩怒曰丞相以京城降活生
靈百萬非功德乎曰學士代王言功德碑謂之代王言可
乎且丞相旣以城降則朝官皆出其門自古豈有門下人
爲主帥誦功德而可信乎後世哉奕輩不能奪金亡微服
北歸鎮陽與渾源劉郁東游泰山至黃峴峯憩萃美亭顧
謂同游曰汨沒塵土中一生不意晚年乃造仙府誠得終

老此山志願畢矣乃令子終先歸遺子知何行視夷險因
垂足坐大石上良久瞑目而逝年七十所著文章有慵夫
集滹南遺老集傳於世節錄金史本傳

明汪子卿志王從之初官翰林後隱
泰山脚跌而化人稱其地曰蛻仙巖
漢以下
方外

泰山老父不知姓氏漢武帝東封見老父於山下道傍頭
上白光高數尺怪而問之老父曰臣年八十五衰老垂死
遇有道者教臣絕穀但服朮飲井水枕神枕枕中有三十
二物以二十四當二十四氣以八當八風臣行之轉老爲
少日行三百里臣今年百八十矣帝受其方賜以玉帛神仙傳

稷邱君泰山下道士也漢武帝時以道術受嘉賞後罷去
帝東封稷邱君擁琴迎拜止帝勿上上必傷足帝上及數
里左足指折諱之還爲稷邱君立祠列仙傳

安期生在泰山遇李少君入山採藥病困安期生與神樓
散一七而愈列仙傳

崔文子者泰山人也世好黃老潛居山下後作黃散赤丸
賣藥都市會民有大疫文子擁朱幡以黃散濟人飲者立
愈所活萬計傳讚曰崔子得道術兼秘奧癘氣降喪仁心
攸悼朱幡電麾神藥捷到一時獲全承世作効列仙傳

馬明靈臨淄人姓和字君實少爲縣吏捕賊被傷瀕死忽
遇一女子云太真夫人也與藥一丸服訖卽愈遂棄職自

號馬明生隨夫人入岱山石室試以鬼怪狼虎不懼挑以
美女子不動夫人曰可教有安期生至夫人以明靈付之
而去後得安期生丹經白日昇舉列仙傳

按馬明靈縣志作馬明生字亦君實淵鑑類函作馬明字君賢互有異同并識之以俟有識者考定焉

劉馮者沛人學道於穆王子服石柱英及中嶽石流黃年
三百餘歲而容轉少後入泰山中列仙傳

晉

張忠字巨和中山人永嘉之亂隱於泰山清虛服氣食芝
餌石年在期頤而視聽無爽苻堅遣使徵之至長安請以
野服入覲堅謂之曰先生獨善之美有餘兼濟之功未也
故遠屈先生將任齊尙父忠曰昔因喪亂避地泰山與鳥

獸為侶尚父之况非敢竊擬乞還餘齒歸死岱宗堅以安車送之行達華山嘆曰我東嶽道士沒於西嶽命也奈何行五十里及關而死諡曰安道先生晉書隱逸傳
羊權字道輿泰山人羊忱少子居茅山得道晉穆帝昇平三年有九嶷山仙女羅郁降權丹室贈權浣布巾金玉條脫各一枚移時而去泰安縣志

南北朝

竺朗京兆人少事佛圖澄碩學淵通尤明氣緯隱於泰山東北之琨瑞谷嘗往來於靈巖說法秦苻堅欽其德行元魏太祖亦遣使致書贈以素旃罽銀鉢為禮後燕慕容德師事居給以兩縣租稅谷中舊多虎朗居之虎患遂絕嘗

與隱士張巨和遊張常穴居而朗大起殿舍連樓疊閣雖

素飾不同然以靜外致稱云十六國春秋

隋

李清北海人少學道開皇四年嘗入雲門山遇人授書一軸立談甫半日歸視城郭人民屋宇皆非訪其子孫已為雲仍矣開所授書乃小兒醫方也試之奇效齊魯間從學者甚眾後入泰山莫知所終泰安縣志

法瓚齊州人初隱於泰山之阜開皇十四年帝東巡守招

訪名德下勅延之命住京師勝光寺岳通志

唐

張鍊師見對賓客集

劉禹錫送東嶽張鍊師詩東嶽真人張鍊師高情雅淡世間稀堪爲列女書青簡久事元君住翠微金縷機中拋錦字玉清壇上着霓衣雲衢不用吹簫件祇擬乘鸞獨自歸

呂崑字洞賓宋天聖戊寅三月二十一日書五言絕句於王母池署其後曰回回翁題政和丙申六月十八日復書七言絕句署其後曰回公再書前後書法皆類顏魯公再書二字類遲賢亭刻人莫能識好事者摩其真蹟於會真宮觀詩則知純陽子三至泰山矣岱史

張仙不知何許人開元中與李某同至泰山學道久之李以宗室辭歸仕至大理丞屬安祿山亂攜家襄陽尋奉使揚州途觀張邀李同宿門庭壯麗僮從璀璨李視女妓中有持箏者酷似其妻及罷張呼持箏者以林檎繫裙帶上各散去明日李復至門館荒穢無行人跡詢鄰人曰此劉道元宅已十餘年無居者尋還襄陽索其妻裙帶果得林檎問其故云一夕夢見五六人追云張仙喚搗箏臨別以林檎繫裙上於是知張已得仙矣岱史

宋

張景巖密州人隱居泰山結茅爲庵以庵上有明月嶂曾產紫芝號曰采芝東都趙鼎臣政和七年四月登岱至十八盤與友坐月下席地而飲俄聞窸窣有人行聲趙心動日山中暮夜安得此聲耶有頃至延坐問之則張景巖也年五十餘鬚鬢黑漆語言純直無方士虛誕氣飲數行探懷出茯苓松葉佐酒歌道曲數闋酒盡穿東嶺而去泰安府志

元

邱處機棲霞人號長春子嘗居泰山南陲以全真為教兒

時有相者謂其當為神仙宗伯年十九師事王重陽為七

真之最太祖特詔求之賜號無為演道大宗師明汪子卿志

張志純號天倪子泰安埠上保人六歲能誦五經十二歲

入元門居會真宮數載道行超羣輩初名志偉元主改今

名賜號崇真保德大師授紫服岱史

元好問送天倪子歸埠山詩太白詩筆埠山頭布襪青鞋欠一游擬欲高人參藥鏡却嫌凡骨比丹邱雲間茅

屋雞犬靜物外煙霞風露秋後日天門重登覽蛻仙巖下幸遲留

徐世隆送天倪子歸埠山詩九十年髮未華道人風骨飽燂霞洞天福地三千里神府仙間第一家牛膠

靈斟美醞兔毫盞淨啜芳芽隱居自愛陶宏景莫作山中宰相誇

徐世隆別號復齋元翰林學士夙與泰山天倪子遊元季

喪亂變姓名上下泰山常居岳祠或城隍廟三稗子從學

二教習泗水超距一授漢書其一曰王圭授舉子業久之

別去言三子貴賤短修其後授漢書者目盲賴說書為衣

食習泗者遇濟南灌城之厄以泗解圍以超距脫死致爵

賞圭登科膺爵齒三人所至悉如其言圭年八十許時世

隆復來見天順間又至泰山惟升元觀一老道士識之其

容貌如兒時所見後不知所終岱史

成興公不知何許人隱泰山修道數十年仙去五嶽真形圖說

海印泰安州人居鄒縣大明禪院幼悟道常夢異僧指示

一日呼弟子曰吾幻身非久住世書偈畢端坐而化三日
悉容如生院上紫霧光明貫天際邑令見之稱為真佛代出
東原海公俗姓于氏光州固陵人也弱冠結茅定陶之白
佛堂度徒千有餘人咸以菩薩稱之元國師海雲號曰明
慧大師旋開泰山竹林古基幽僻有終焉之意跨寶峯葺
草爲廬未旬日緇素踵迹之欲廣其宇海曰吾緣盡矣樹
此蘭若功輸爾輩勿忘吾囑言訖而逝其後竹林寶峯禪
寺之興實自海始焉泰安縣志

劉朗然萊州府人遍訪名勝棲止岱麓今其遺蹟曰老人

若朗然子洞云泰安縣志

吳守一蘭陵人從劉朗然得鍊度術辟穀數年忽有道人

入廬與語袖出茶烹而飲之道者出戶遂失所在吳年至

九十餘羽化時異香滿室白鶴遶空山東通志

泰安縣志按岱史誤爲明時人亦不言鍊度何處從吳舫翁亦稱其人故從通志錄之

孫清靜女冠寧海縣人常入泰山修道今嶽北有古洞極

深敞石牀天然清泉香冽曰清靜石屋乃其遺蹟泰安縣志

大行齊州人入泰山草衣木食行法華三昧感普多現身

遂覺心眼洞明見十方諸佛猶如明鏡中像至元間詔入

官賜號開國法師常精進菩薩岳通志

行全清河大姓房氏子也生有宿慧旣長受具戒於本州

之廣教院歷游講肄通曉律義創刻宗門碧巖經律文字

往來奉高山中結茅宴坐於天勝寨上默究元理兗州節

度左副元帥張進遂興葺布金山之大雲寺請住持焉落髮弟子二十有五人內德友者載其師資接見機緣契証之語甚多晚復還鄉井時稱其來如著衫去如履屣云

廟碑

德友姓王氏本州雙村人元時盜起避地泰山之天勝寨時恩州律師全公先在此卽往炷香旣蒙示及去師不遠於獅子峯下抱節誓道或三日一食或五日一飯若此者三稔忽聞鴉鳴而悟入曰從今後更疑著天下老和尚鼻

孔也
布山廟碑

張君寶別號保和容忍三丰子遼東懿州人生於金世多力能移禪塔八日爲張拉塔或稱爲張躡邊嘗修鍊於岱

今傳其居爲懶張石屋云
明史

毛仙姑本州人築庵徂徠山修持三十餘年於延祐二年十一月十九日臨化囑曰混處修持三十年是非海裏了真緣如今脫下皮囊目拍塞靈空永自然時泰定軍節度時宥爲紀石遂稱其地爲毛老谷
墓碑

明

雲公滿空禪師高麗僧也永樂間與數僧航海而來宣德三年給度牒令參方禮祖因登泰山訪古刹重建竹林寺復駐錫普照四方衲衣受法者數千天順七年閏七月二日說偈而逝弟子洪因爲建塔立碑稱普照重開山第一

代禪師
塔碑

雪蓑不知何許人或目爲吳人佯應之能詩善書彈一弦
琴諸技精絕嘗遊泰山徂徠嘉靖間館於李中麓家偶與
中麓遊蔬圃手撮韭葉濡墨大書又在碁天觀書元之又
元四字故脫一點書在石壁高處札木爲梯乃可至既下
梯佯驚曰誤落一點可如何旋自取頭上葛巾扭結如繩
浸於墨中大呼取巾望石壁一拋遂點字上人始駭其非
常後辭中麓入山採藥往來於海岱間數年不知所終

事紀

王陽輝號三陽東平道士也徧遊名山歸隱嶽麓與其徒
華陰雲山咎公輩相度於凌漢峯下鑿石爲窟以居鄉人
爲葺神宇數椽曰三陽庵迄今遂成名勝

廟碑

柴慧庵崑山羽士深契黃老之旨修養於岱陽之摩天嶺

下名其居曰潛仙庵

廟碑

散髮道人者自言洛人嘗趺坐仙人橋上苦行十五年問
其姓名不對衲衣跣足步崖間如飛後不知所終

代岱史

于坑虛汶上道士也萬歷間闢室礫石峪之隱仙觀棲神
元默壽至八旬蛻去後一月有路某遇汶上見赤一足攜
一履云將往南京先是寧陽徐夢覺徐斐然十餘人自南
海歸路由金陵見坑虛在市中與語移時及旋里聞坑虛
已卒計在南京之困卽過於汶上之次日也今峪西北貴
人峯下有于仙葬衣冠處

泰安縣志

叩頭僧不知何許人嘗棲泰安之靈派侯祠夜則跏趺通

宵不寐晝則周遊城市叩頭勸善人以是呼為叩頭僧嘗
語人曰我參方五十年矣蓋載內胎生卵生濕生化生惟
人為貴具此靈性便可立地成佛莫使寶山歷盡虛過一
生後遊清源預告人圓寂之期而化

泰山紀事

單道人自稱日照人赤脚挽雙髻破衲懸瓢訪侍御宋燾
於青巖洞中為十日之飲醉後意態粗惡燾初不知其為
異人也善幻術倏忽變化莫可端倪後辭去隔歲餘有請
箕仙者仙降大書曰我單道士也書詩甚多有句云純陽
遊岱嶽轉轉尋同侶始悟單字兩口為呂日照者純陽也
臨行時曾留衲衣一藤扇一未幾皆失去其扇上有詩云
鬱鬱者松植被岱阿維葉扶疎蔭茲嘉禾行子負戴白汗
交刃止於繁陰載咏載歌裹糧將炊乃伐其柯伐柯云何
曰惟晨炊勿戕爾根畱為生滋爾清我燥弗療我饑我行
其側痛惜漣洏拂袖壺嶠世人永辭字類漢張芝惜不可
再覓矣

泰安縣志

朝

元玉字祖珍號古翁廣陵崇川人嗣法金粟天岸老人居
泰山普照寺聚經典數千卷澄思密探寺前一石題曰界
塵石名流往訪咸比之遠公蓮社云有石堂集金臺隨筆

諸刻

岳通志

吳雲號舫翁別號三堂居士吉安人以黃冠讀書嶽麓與
闕里孔貞瑄建岱頂聖廟又肖石像於中古翁嘗稱其文

章道德不易得豈其有託而逃者歟所著有學舫石堂一

朱孝純圖志案施閏章愚山集送吳舫翁序稱其少為安成名士明末自髡為僧嘗從青原樂禪師遊豈後復隱於黃冠耶

泰山志卷第十四

泰山志卷第十五

朝議大夫山東泰安府知府休寧金榮纂輯

金石記一 秦 漢 晉 東魏 北齊 唐 五代

無字碑

顧炎武曰知錄云岳頂無字碑世傳為秦始皇立
按秦碑在玉女池上李斯篆書高不過四五尺而銘文
并二世詔書咸具不當又立此大碑也考之宋以前亦
無此說因取史記反覆讀之知為漢武帝所立也史記
秦始皇本紀云上泰山立石封禪其下云刻所立石是
秦有文字之證今李斯篆是也封禪書云東上泰山泰
山草木葉未生乃令人上石立之泰山巔上遂東巡海
上四月還至奉高上泰山而石刻是漢石無文字
之證今碑是也後漢書祭祀志亦云上東上泰山乃上
石立之泰山巔然則此無字碑明為漢武帝所立而後
之不讀史者誤以為秦耳
葉九苞金石錄補云泰山無字碑在絕頂高三丈餘闊
四之一色微黃光潤如蠟或云下有金泥玉檢以此石

泰山志卷十五 金石

審之相傳為始皇立顧亭人力辨其非定為漢武立余
與徐季重家敷文徘徊其下忽蒸雲如絮頃刻向人不
相見其雲氣中猿臂蟬聯而
下甫下山頂雨飄飄然至矣
按孫何碑解云管子稱無懷氏封泰山刻石紀功則刻
石泰山尚矣是石在絕頂玉皇廟門外登封壇下高
今尺一丈五尺六寸南北面廣三尺六寸東西側厚二
尺四寸上微隘於下頂以橫蓋另覆以石四稜稍磬折
石色明淨可鑑非山之所有或曰石表或曰神主石或
言其下有金書玉簡立於何代顧氏引史書所載似有
依據但考其廣狹長短制度與瑯琊刻石相符或亦是
始皇立而未刻者果是漢石何以毫釐與秦碑不爽但
遙遙數千載秦歟漢歟安得起山靈而問之石西南稜
上有正書一帝字審其筆法頗似唐人或好事者為之

秦始皇刻石 李斯篆書

二十八年

皇帝臨位作制明法臣下修飭廿有六年初并天下罔不

賓服親軼遠徠登茲泰山周覽東極從臣思迹本原事業
祇誦功德治道運行諸產得宜皆有法式大義著明陞於
後嗣順承勿革皇帝躬聽既平天下不懈於治夙興夜寐
建設長利專隆教誨訓經宣達遠近畢理咸承聖志貴賤
分明男女體順慎遵職事昭隔內外靡不清淨施於昆嗣
化及無窮遵奉遺詔永承重戒

二世詔書

二世元年

皇帝曰金石刻盡始皇帝所為也今襲號而金石刻辭不
稱始皇帝其于久遠也如後嗣為之者不稱成功盛德承
相臣斯臣去疾御史大夫臣德昧死言臣請具刻詔書金

石刻因明白矣臣昧死請制曰可

歐陽修集古錄云余友江鄰幾謫官奉符嘗至泰山頂上視秦所刻石處云石頑不可鑄鑿不知當時何以刻之也然四面皆無草木野火不及故能若此趙明誠金石錄云泰山刻石以史記考之頗多異同史云親巡遠方黎民而碑作親輒遠黎史云大義休明而碑作著明史云垂于後世而碑作親輒遠黎于後嗣而碑作躬聽史云男女禮順而碑作體順史云施于後嗣而碑作躬聽史云男女禮順而碑作體順史云施石而碑作金石刻皆足以正史氏之誤劉跋秦篆譜云史記載始皇帝二世皆行幸郡縣立石刻辭皆謂已亡余以四尺形制似方而非方四面皇刻辭皆謂已亡余以四尺形制似方而非方四面廣狹皆不等所謂五尺者南面稍平處故士大夫多得以紙墨漸若可辨然終意其未也政和三年秋復蝕試以紙墨漸若可辨然終意其未也政和三年秋復宿嶽頂親以羶椎從事始得完善四面總政和三年秋復十二字從西面起以東北東南為次西面六行北行行東面六行南面七行其末有制曰可三字復轉在西南

稜上乃知十二行是始皇辭其十行是二世辭以史記證之文意皆具字共二百二十有六可讀者百四十有六其毀缺及漫滅者七十有六李斯小篆古今所師經千三百有餘歲而復彰茲可尚也董道廣川書跋云余至泰山就視其石高纔六九尺方面二尺餘以亂石培其下昔所建立蓋鑿石為穴下寢其中歲久摧仆則後人累石固其趾以存至字則止此未可以久遠期也都穆金薤琳琅云子家舊藏此本僅五十一字乃二世詔即歐陽公所謂江鄰幾本趙氏所謂兗州及宋莒公本是也近得劉譜觀前加九十三字此則跋之功也歐陽公宋莒公皆不知四面有字蓋在劉譜未出之前元吾行子行號稱博洽其學古編云石皆剝落惟二世詔一面稍見豈亦未嘗見劉譜耶金死言臣請具刻詔書金所存惟臣斯臣去疾御史夫臣味九字在嶽頂碧霞祠東廡而泰安城內東岳廡中別刻一石亦止二十九字其本不傳世刻石存二十九字州城內岱廟中別刻一石其文同按宋劉跋序秦篆譜時尚存二百二十二字今止十一宋本不傳久矣惜哉

按二刻同一石在山頂宋真宗東封此山兗州太守模
本以獻凡四十餘字其後宋莒公模刻于東平郡江鄰
幾治奉符又刻于縣解按其文皆二世詔也蓋碑石四
面北西東三面為始皇詔書南面為二世詔書石仆而
後人起立之以二世詔稍完植之南鄉故其三面摩滅
者世多不傳見大觀間汶陽劉跋親至泰山絕頂去其
翳蝕模其全文以歸雖殘缺剝落然首尾完具不可識
者無幾于是秦篆完本復傳人間矣都元敬尚得見劉
氏全文後北平許某始于榛莽中移置碧霞元君宮東
廡吳同春遊泰山紀云秦篆苦三面嵌壁不能盡讀令
數力士出而觀之已與劉氏所記不能符合迨亭林顧
氏所見唯二十九字本乾隆庚申碧霞宮火而是石遂
亡後人摹其本于岱廟今岱廟本亦佚邑人聶氏又別
募一石于縣署土地祠雖仿自明本而神氣已非今所
得見者唯此耳海內諸君子寶
二十九字殘刻珍如尺璧宜哉

漢

武帝鼎錡篆書
今佚

太始四年

右銘見梁虞荔鼎銘武帝登泰山鑄一鼎高四尺錡
為之其形如甕有三足太始四年造其文曰登于泰山
萬壽無疆四海寧謚

神鼎傳芳大篆書

光武帝刻石見後漢書今佚
文見封禪志

建武三十二年二月

師曠墓畫像在新甫山麓墓前

右刻四面無年月作車輪蛇龍形在新甫山麓師曠墓
前按岱宗介齊魯間環抱諸山皆支阜也自南而下曰
社首其右曰高里迤南曰亭亭東南曰新甫逾汶曰徂
徠東北曰琨瑞聯屬西北曰靈岩雖界入他縣仍岱之
支脈也故新甫琨瑞靈岩
諸山遺刻亦在所錄焉

晉

任城太守夫人孫氏之碑額 篆書
在新甫山麓

泰始八年

金石

夫人濟南孫氏之中女也實曰口姬其口與齊同姓口別
閭族遂以為氏父列卿光祿大夫建德亭侯以儒雅稱世
濟其休夫人少有淑質純靜不口寬仁足以容眾明敏足
以辯物九歲喪母少為父所見慈撫終喪哀毀坐不易位
口有隱括憐母之訓罔以加焉父時未有繼室長沙人桓
伯序有寡妻伏氏魏文帝以用妻之伏氏柔少有國色然
非所好而顧違尊命莫之能定夫人謂父曰何不以其嘗同
寮辭之父意乃寤文帝詔報之曰生敬其人死辭其室追
遠敬終違而得道者也父悅入謂之曰昔臧武仲先犯齊
壯不令與已邑今我不犯尊而蒙優詔同歸殊逾余其口
代伯序為侍中父為侍郎此為同寮故夫人口口父為勳

海太守十餘年政化大行孤宣口口口口意時夫人口
口在家止口合口而謂之口口威而退雖天之口然事君
不懟口能口儉聞口口口為吏部尚書多用老成先帝舊
臣舉口口從必不忘君口而口舉君為侍中夫人口而口
過窮理盡情為父所異皆此類也夫人在羊氏次第有口
度承上接下眾皆悅之任城非夫口口口夫人由此相帥
孝口加之謙勤戰戰臨深唯恐不逮是以舅姑嘉其淑婉
娣姒宗其德音口口人為婦卅餘載言無口過口無怨惡
故也口口且感慈口口口口下惟詩人刑于之言瞻前
口後率由弗違以御于家邦終始以孝聞口口夫人之口
口口口口口二口小子宏明宏哲皆口口不幸早亡子

孫皆仁厚振振有麟止之化皆是義形□□□□□□
 □□□□八年□月庚寅□十二月甲申□嗣子迅哀懷
 永絕□□罔極追惟□□□□□□力不肅之訓
 □□歎曰古者鐘鼎制銘所以章君父之令德也又有號
 謚□□□□□□□□□□我先妣立言立德同之不朽可
 沒而無稱哉于是乃追而紀□為之辭曰奠乎文母于我
 夫人潛神內識罔不彌綸和樂色養□□□□□□
 □□是勤昧旦□□□□問日新喪難宏多仍罹□□翼翼
 小心惟憂用老□□□□□□□□□□惟□□□□
 切切遺孤辟踊靡及日古□□□□□□□□何以□□□□
 告哀□□

右碑在新甫山麓張庄原上高七尺廣三尺圭首額下
 有穿題曰晉任城太守夫人孫氏之碑十一字作隸字
 三行字大四寸碑文其二十行卅七字大寸二分筆
 勢謹嚴文詞古雅猶存兩漢遺意通體雖剝泐過半列
 敘事實多足與史相證明向來金石家均未之見以乾
 隆癸丑歲為錢唐江鳳彝搜得西晉石刻本希見婦人
 碑銘尤少矣命新泰合柳世珍建碑亭以覆之俾數千
 年佳刻不致損毀于樵人牧豎之手斯則守土之責也
 武億曰按魏志列傳桓階字伯緒長沙臨湘人碑以緒
 為序古字通故也階傳言劉表辟為從事祭酒欲妻以
 妻妹蔡氏階自陳已結婚拒而不受因辭疾告退是當
 為階元配此碑載伏氏年少似是其繼室也階身沒而
 遺事可見又如此碑言伯序為侍中父為侍郎此為同
 寮按階傳魏國初建為虎賁中郎將侍中而夫人之父
 官侍郎亦同其時其後父歷官侍郎渤海太守吏部尚
 書侍郎則位亦顯矣然史不為立傳碑亦不書名按盧
 毓傳文帝以毓為吏部尚書使毓自選代乃舉阮武孫
 邑帝於是用邑按碑言父為吏部尚書其時正與相近
 疑其父為孫邑也碑云夫人在羊氏按羊氏當晉時泰
 山南城門閣最著任城太守為羊氏之族今惜碑不見
 其名殆莫可稽也晉書職官志王國改太守為內史以
 宗室傳證之景王陵泰始三年轉封任城王之國然則

任城為王國不宜稱太守蓋當云內史而淆亂往往相
易不可遽數如桓彝見於武帝紀稱宣城內史及按桓
溫傳則亦稱太守

桂馥曰按魏志管寧傳侍中孫邕薦寧邕歷官與碑同

疑即夫人之父魏文帝典論光和中北海王和平亦好

道術自以當仙濟南孫邕少事之據此則邕為濟南人

蓋可證鮑勛傳帝屯陳留郡界太守孫邕見案碑言勃

海太守不及陳留或邕歷二郡但舉其一爾碑又云

長沙人桓伯序魏志桓階傳伯緒案階陛也序東西

廡也當為序碑又云昔臧武仲先犯齊壯不合與已邑

考左氏傳齊莊公將為武仲田與之言伐晉武仲以鼠

為喻遂不與田碑指此事謚法武而不遂曰莊此莊字

本作壯晉時左傳本尚作壯後改為莊漢趙充國蜀漢

關羽魏曹休桓階許褚龐德徐

晃文聘州秦並謚壯侯可證也

朱文藻曰按碑不見年號碑中有年月可辨者惟八年

十二月甲申等字八年上漫漶莫辨夫人父仕魏文帝

朝其時夫人年初長自文帝初元迄元帝禪晉其在位

四十六年者夫當已六旬則入晉歷年不久終西晉之

世有八年者惟武帝之太始太康惠帝之元康元甲八

年距晉初已三十六年計夫入有九十餘歲碑文無一

語頌及高年斷不逮此今以資治通鑑目錄追考之元

康八年十二月戊戌朔則甲申在十一月其非元康八

年無疑矣太康八年十一月其非元康八年十一月

十二月其非太康八年十一月其非元康八年十一月

庚午朔甲申是十五日遂定此碑為太始八年然則夫

人之壽垂七十矣又按碑甲申下闕一字庚寅下闕一

字庚寅上有月字月字上闕微存一似係十字此上乃

泰山君改高樓碑

升平三年六月

按陶貞白真靈位業圖五岳君五百年而一替泰山君

秦巖字景倩此其神與是刻見金石錄及墨池編今佚

東魏

胡元方等造像記

正書 在秦安城東 姚莊大雲寺西墀下

興和二年

右刻在石柱上四面 佛像文已剝泐殊甚僅賴有大

魏字與字二字庚申字 知其為東魏興和二年庚申歲

泰山君改高樓碑

右刻在石柱上四面 佛像文已剝泐殊甚僅賴有大

也餘惟數
人名可識

楊顯叔造象記 正書 在琨瑞山
神通寺四門塔上

武定二年

武定二年口乙卯朔十四日戊辰冠軍將軍司空府西閣
祭酒齊州驃大府長流參軍揚顯叔仰為亡考忌十四日
敬造石像四區願令亡者生常值佛

右刻字畫明淨筆意
瘦挺造象中佳製也

北齊

大般若經磨崖 王子椿隸書

武平元年

右刻在徂徠之陽光化寺東南一里許石崖上字大七
八寸雄古可愛末書冠軍將軍梁父縣令王子椿款字

一行全文
多剝蝕

四佛號刻 隸書 在
前石之左

無年月

般若波羅密經磨崖 隸書

武平元年

右刻在光化寺東南里許映佛岩上字體大小與大般
若經同作二層刻上書般若波羅密經冠軍將軍梁父
縣令王子椿十七字下層書經文半
多殘缺未題武平元年僧齋大衆造

金剛經殘刻 隸書

金石錄補曰泰山御帳坪之南有石經峪石如平臺舊
刻金剛經後人刻大字蓋其上字皆徑尺黃花洞內有
唐人題名與

白蝙蝠詩
按石刻在南山麓石坪縱橫數十畝作碁局紋隸字大
徑尺餘奇古雄秀向來金石家未獲觀焉惟明人華亭

孫克宏古今石刻碑帖目云秦岳之陽刻金剛經大尺許相傳為王右軍書今攷其筆法實與鄒縣北齊韋子深刻經同出一手其亦為韋氏作無疑明王世懋紀遊云此書不能定唐宋元人斷無此結構氣味又陳國瑞題名有曰孰視筆畫非人所不能歷千百年曾不磨滅豈非神力護持以遺觀者爾時在北宋人視之已歎美若此惟地當瀑泉奔赴之區剝泐殊易今明淨可讀者存字不滿二百匪同碑碣可以人

千佛崖造像殘刻

正書 在臨瑞山 神通寺 千佛崖上

武德口年

右刻文雖殘毀書法絕精尚存有鄰禪師柔門僧沙棟國書傳記及大唐武德口年厥年七十等字可識此外上下四旁唐人造像鑄刻紛紛其無年月者十餘首審其字體亦唐刻也

貞觀十八年

千佛崖劉元意造象記 正書

顯慶二年九月

大唐顯慶二年九月十五日齊州刺史上柱國駙馬都尉

渝國口口劉元意敬造口象供養

右刻筆致 類顏平原

千佛崖僧明德造象記 正書

顯慶三年

千佛崖南平長公主為太宗文皇帝造象記 正書

顯慶三年

千佛崖趙王福船象記 正書

泰山志卷十五 金石

顯慶三年

大唐顯慶三年行青州刺史清信佛弟子趙王福為太宗文皇帝敬船彌陀像一軀願四夷順命家國安寧法界眾生普登佛道

右造象記有年月者五首在山東北九十餘里曰瑤瑞山石嶂高廣名千佛崖唐人徧勒佛象于上各有題記凡有年號者得武德一貞觀一顯慶四文明一永淳一餘無年號者不盡拓崖之西南占剎荒涼即神通寺也

顯慶六年二月

岱嶽觀造象記 正書 在山南麓老君堂西碑北面第一層

金石文字記云泰山東南麓有唐岱岳觀今存小殿三楹土人稱為老君堂其前有碑二高八尺許上施石蓋合而束之其字每面作四五層每層文一首或二首皆唐時建醮造象之記空處又有唐代人題名東西側有詩並題名中二側面無字唐碑存于泰山者唯此及元宗泰山銘蘇廼東封朝觀頌二文皆磨崖刻于山上

碑在山下以小而雙束故不似書非名筆故摹拓者而獨完至今因漢唐時六帝一后修齋建醮凡二十許其此二碑亦異乎近代之每歲一碑以勞人而災石者矣

封禪朝覲壇頌 正書 李安期撰 在山頂今佚

乾封元年正月

波擾五岳塵飛深入反陷重圍動想神京結陣則浮雲未口口巢王元吉委鎮策而地口置州縣兼神初基未遑西畧懇構兩開玉帳楊口魏竊弄神璽規亨籠霄之碧建德旌口累捷而致雙擒眇六年間未方勞誓收口口九天志

清八表英威迅其嘗捨于口幣俗于龍英玉帛

右刻在山頂大觀峯間金石文字記云明閩人林焯開府山東以忠義廉節四大字鑱其上頌文去其大半後勒御製詩刻而是文遂盡磨去今雲峯二字之下是其舊刻處也

劉仁願題名

正書 在山頂雲峯西

乾封元年二月

口口衛將軍魯城縣開國公上柱國劉仁願頌川郡夫人

陳大男口口出身口口二男懷瓚任宏文館學士女一人

新婦竇二新婦于乾封元年二月十九日口記

沈元山左金石志云右題名磨崖按泰安縣志載此碑名漫漶莫辨蓋因題名上有嘉靖癸丑吳天壽大字題名掩刻致有漫漶細辨之所損尚無多也年月之後有盤隨挑兒高益富呂小隴奉母聶阿稔笙博士沈小雙等字武虛谷云皆後人所題不記年代疑為金一碑也

有造塔博士皆此類也

登封紀號文

飛白書額 高宗御製并

乾封元年二月

碑側 正書

小字登封紀號文

飛白書額 高宗御製并

碑陰 小字

右二刻一在山頂一在山下並見金石錄石亡已久接高宗乾封元年戊辰祀昊天上帝封玉冊庚子祀皇地祇于社首山之降禪壇率六宮以登當時外夷之從封者如車鼻可汗傳云唐高宗封禪車鼻可汗葛邏祿叱利等三十餘人皆從至山下勒名于封禪碑會要云突厥于闐等十一蕃長扈送高麗傳云高麗王高藏遣子男福從封太山流鬼傳云有僭罪者麟德中酋長來朝從封太山可見當時車騎震殷極一朝之盛軌故山上山下並刻石以紀功惜一舉三失之議君子譏之徒侈文字之華果足垂示來許耶

岱頂投龍壁題記

正書 在山頂雲峯西洞口東向

乾封元年二月

山左金石志云右磨崖題名字本模糊加以右方有明嘉靖二年龍池高誨刻字掩其上愈不能辨僅尋其影迹之掩不盡者得其姓氏年月二百餘字武虛谷云按舊唐書高宗紀麟德三年春正月戊辰朔車駕至泰山頓壬申御大封事諸臣故有宮府寺丞檢校造封元宮此皆從封有等官行內府監主簿王知敬見書王門整備大使等知敬善隸書武后時仕為麟臺監者即友貞傳云父知敬善隸書武后時仕為麟臺監者即其人後有西臺主書王行真按職官志龍翔改中書省為西臺其屬中書舍人下有主書四人即此西臺主書也又有奉勅投龍壁於介丘者一人投壁似即封禪瘞玉之事益都雲門山有北海太守趙居貞投龍詩碑序云趙居貞登雲門山投金龍環壁奉為開元天地大寶聖文神武皇帝祈福也事與此同

岱嶽觀造象記

正書 在西嶽北面第二層

儀鳳三年三月

千佛巖王萬元等造象記

正書

永淳二年六月

永淳二年六月為天災渾側口諸村史同王萬元百餘人等于明口口口口遂蒙甘澤設齋造象

千佛崖趙盱造象記

正書

文明元年四月

岱岳觀造象記

正書 在東北面第二層

神龍元年三月

神通寺僧无畏造象記

正書 在神通寺四門塔上

景龍元年

岱岳觀修齋醮記

正書 在東碑北面第四層

景龍二年二月

岱岳觀建醮報賽記 正書 在東碑 南面第一層

景龍三年三月

周

垂拱殘刻 在紅門 東今佚

垂拱元年

右刻據邑人聶氏泰山道里記載紅門東有豐碑斷路已磨泐無字可讀惟碑額稜上有垂拱元年口月廿五造及年五月等字碑側猶有宋人題識當日東封安在哉茫今古泯塵埃字句可識翻視底面有行書字影差小隱隱莫辨豈即高宗乾封元年小字登封紀號文立于山下者而武后補刻之歟

岱岳觀造象記 正書 在東碑 北面第一層

天授二年二月

王仁恭祭岳頌

嚴浚序 邢合均頌 杜行均八分書 見金石錄今佚

長壽二年正月

岱岳觀造象記 正書 在西碑 北面第一層

萬歲通天二年四月

岱岳觀造象記 正書 在西碑 南面第一層

聖歷元年十二月

陪勅使麻先生祭岳詩 正書 守博城令馬口口在岱岳觀 雙碑東一側第一層

金石文字記曰久視二年記所稱神都青元觀主麻慈力即其人也武后遣之至觀修醮神都即東都故有伊水嵩岩之句

岱岳觀修齋醮記 正書 在西碑 北面第二層

久視二年正月

又一首 正書 在東碑 北面第二層

長安元年十二月

又一首 正書 在西碑 南面第二層

長安四年九月

又一首 正書 在西碑 北面第三層

長安四年十一月

唐

修封禪壇記 賈膺福 并正書 見金石錄今佚

景雲二年八月

金石錄云初余得賈膺福八分書大雲寺記愛其筆法後又得此記字為小楷尤工妙可喜

岱岳觀設醮投龍記 正書 在西碑 南面第三層

景雲二年八月

又一首 正書 在東碑 南面第三層

開元八年七月

封祀壇頌 正書 張說撰 在城 南四里舞鶴臺今佚

開元十四年

皇帝六葉開元神武皇帝再受命致太平乃封岱宗禪社首鑿石紀號天文煥發儒臣志美立碣詞壇曰厥初生人俶有君臣其道茫昧其風樸畧因時而歛起與運而紛落泯泯沒沒無聞焉爾後代聖人取法象立名位衣裳以等之甲兵以怛之於是禮樂出而書記存矣反其源致敬乎天地報其本致美乎鬼神則封禪者帝王受天命告成功

之爲也閱曩聖之奧訓考列辟之通術譬若天而不成曷
背道而靡失由此推之封禪之義有三帝王之畧有七七
者何傳不云道德仁義禮智信乎順之稱聖哲逆之號狂
悖三者一位當五行圖籙之序二時會四海昇平之運三
德具欽明文思之美是謂與天合符名不死矣有一不足
而云封禪人且未許其如天何言舊史者君莫道於陶唐
虞舜臣莫德於皋陶稷禹三臣降德皆有天下仲尼叙帝
王之書繫周秦之誓明魯祀周公用王禮秦承伯益接周
統孔聖微旨不其效歟然秦定天下之功高享天祿之日
淺天而未忘庭堅之德也故大命復集於皇家天之贊唐
不惟舊哉其興之也元靈啟迪黃祇顧懷應歸運以義舉
撫來蘇以利見湯也無放夏之慙武也無伐殷之戰高祖
創業四宗重光德有格天漏泉蒸雲濡露菌蠢滋育氤氳
涵煦若天地之覆載日月之照臨溥有形而歸景馨無外
而宅心百有八年於茲矣皇帝攘內難而啟新命戴睿宗
而續舊服宇宙更闢朝廷始位蓋羲軒氏之造皇圖也九
族敦序百姓昭明萬邦咸和黎人於變立土圭以步歷革
銅渾以正天蓋唐虞氏之張帝道也天地四時六官著禮
井田三壤五圻成賦廣九廟以尊祖定六律以和神蓋三
代之設王制也武緯之文經之聖暮之神化之然猶戰戰
兢兢日慎一日納規誨以進德遂忠良以代工講習乎無
爲之書討論乎集賢之殿寵勇爵貴經明翌乎鸞鸞之列

在庭毅乎貔豹之師居鄙人和旁感神寶沓至乾符坤珍
千品萬類超圖溢牒未始聞記我后以人瑞爲心不以物
瑞爲意王公卿士儼然進曰休哉陛下孝至於天政合乎
道前年祈后土人獲天穰間歲祀圓丘日不奄而感祥以
祈聖因事以觀天天人交合其則不遠意者喬即壇路望
翠華之來上帝儲恩俟蒼璧之禮久矣焉可專讓而廢舊
勛羣臣固言至于再至于三帝乃挹之曰欽崇天道俯率
嘉話恐德不類敢憚于勤其撰巡守之儀求封禪之故旣
而禮官不戒而備軍政不謀而輯天姥練日行道六
甲按隊八陣警蹕孟冬仲旬乘輿乃出千旗行道六
行霍獲燦爛飛焰揚精原野爲之震動草木爲之風生歷

郡縣省謠俗問百年舉百祀興墜典葺闕政攸祖之人室
家相慶萬方縱觀千里如堵城邑連歡邱陵聚舞其中垂
白之老樂過以泣不圖蒿里之魂復見乾封之事堯雲社
舜日還神華靈鬱爛漫乎穹壤之間是月來至于岱祇祇
齋宮滌濯靜室凝神元覽將欵泰一議夫泰山者聖帝受
天官之宮天孫總人靈之府自昔立國莫知萬數克升中
而建號惟七十而有五我高祖六之而今七矣非夫尊位
盛時明德曠代遼闊難并之甚哉先時將臻夫大封也累
封疆于高岡築泰壇于陽趾夫其天壇三襲辰陞十二咸
秩衆靈列坐有次崇牙樹羽管磬鏞鼓宮縣于重墻之內
于戚殺爰鈎戟戮戮周位于四門之外代國重器傳代絕

瑞旅之於中庭玉輦金轂翠冒黃屋夾之于端路庶官百
辟羌夷蠻貊褒成之後讓王之客序立于禮神之場髦頭
弩牙鐵馬金鏃介冑如雪旗幟如火遠匝于清禁之野於
是乎以天正上元法駕徐進屯于乘於平路畱羣臣於谷
口皇帝御六龍陟萬仞獨與一二元老執事之人出天門
臨日觀次沆瀣宿巉巖赤霄可接白雲在下庚寅祀高祖
於上封以配上帝命樂官於下位以享衆神皇帝冕裘登
壇奠獻俯僂叶金奏俯羽舞撞黃鐘歌大呂開閭闔與天
語清將信公奉斗布度懋建皇極勤恤蒼生昭報乎未兆
讓災乎未萌上下傳節而禮成樂遍福壽同歸而帝賜神
策乃檢玉牒於中頂揚柴燎於高天庶忠誠之上達

而駕烟日轡方旋神心餘眷五色雲起拂焉以
歲山呼從天而至地越翌日尊睿宗侑地祇而禮
張大樂觀東后國風惟舊無黜幽削爵之誅王澤惟新有
肯災大賚之慶不泆日至化洽於人心不崇朝景福遍於
天下然後藏金匱於祔室迴玉鸞於上都煌煌乎真聖朝
之能事而高代之盛節者也于斯之時華戎殊俗異音同
巖日兵合多雨山峻多雲豈有大舉百萬之師尅期千里
之外及行事之日則天無點翳地無纖塵嚴冬變爲韶景
寒風鬱爲和氣非至德其孰能動天如此其順者乎昔人
云自西自東自南自北無思不服今信知聖人作而萬物
覩其心服之之謂矣或曰祭泰折玉先后非禮歟曰是禮

也非宜也王者父事天母事地侑神崇孝無嫌可也且夫
柴瘞外事帝王主之蒸嘗內事后妃助之是開元正人倫
革弊禮起百王之法也故令千載睹末光聆絕韻咀甘實
漱芳潤爍元妙之至精流不已之淑聲臣說作頌告於神
明四皇墳而六帝典與古昔莫能名徒採彼輿人之詩
曰大矣哉惟天為大惟聖之率我萬國受天之祺子孫
百代人神共保綏之云爾而已矣

紀泰山銘 綵頌 元宗 製并八分書

開元十四年九月

紀泰山銘 御製卷書

朕宅帝位十有四載顧惟不德愴于至道任夫難任

難安茲朕未知獲戾于上下心之浩盪若涉于大川賴上
帝垂休先后儲慶宰衡庶尹交修皇極四海會同五典
暢歲云嘉熟人用大和百辟僉謀唱余封禪謂孝莫大
嚴父謂禮莫尊於告天天符既至人望既積固請不已
辭不獲肆余與夫二三臣稽虞典繹漢制張皇六師震疊
九寓旌旗有列士馬無譁肅肅邕邕翼翼溶溶以至千代
宗順也爾雅曰太山為東嶽周官曰兗州之鎮山實惟天
帝之孫羣靈之府其方處萬物之始故稱岱焉其位居五
嶽之伯故稱宗焉自昔王者受命易姓於是乎啟天地薦
成功序圖錄紀氏号朕統承先王茲率厥典實欲報元天
之眷命為蒼生之祈福豈敢高視千古自比九皇哉故設

壇場于山下受羣方之助祭躬封燎于山上冀一獻之通
神斯亦因高崇天就廣增地之義也乃仲冬庚寅有事東
嶽類於上帝配我高祖在天之神罔不畢降粵翌日禪於
社首侑我聖考祀於皇祇在地之神罔不咸舉暨壬辰觀
羣后上公進曰天子膺天符納介福羣臣拜稽首千萬歲
慶答歡同陳誠以德大渾叶度彝倫攸叙三事百揆時乃
之功萬物由庚兆人允植列收衆宰時乃之功一二兄弟
篤行孝友錫類萬國時惟休哉我儒制禮我史作樂天地
擾順時惟休哉蠻夷戎狄重譯來貢累聖之化朕何慕焉
五靈百寶日來月集會昌之運朕何感焉凡今而後儆乃
在位一王度齊象法推舊章補缺政存易簡去煩苛思立
人極乃見天則於戲天生蒸人惟后時乂能以美利利天
下事天明矣地德載物惟后時相能以厚生生萬人事地
察矣天地明察鬼神著矣惟我藝祖文考精爽在天其曰
懿余幼孫克享上帝惟帝時若馨香其下丕乃曰有唐氏
文武之會孫隆基誕錫新命纘戎舊業永祚天祿子孫其
承之余小子敢對揚上帝之休命則亦與百執事尙綏兆
人將多于前功而毖彼後患一夫不獲萬方其罪予一心
有終上天其知我朕惟寶行三德曰慈儉謙慈者覆無疆
之言儉者崇將來之訓自滿者人損自謙者天益苟如是
則軌迹易循基構易守磨石壁刻金記後之人聽詞而見
心觀末而知本銘曰

惟天生人立君以理惟君受命奉天為子代去不留人來
無已德涼者滅道高斯起赫赫高祖明明太宗爰革政
奄有萬邦罄天張宇盡地開封武稱有截文表時邕高宗
稽古德施周溥茫茫九夷削平一鼓禮備封禪功齊舜禹
巖巖岱宗衍我神主中宗紹運舊邦維新睿宗繼明天下
歸仁恭已南面氤氳化淳告成之禮畱諸後人緬余小子
重基五聖匪功伐高匪德矜盛欽若祀典丕承永命至誠
動天福我万姓古封太山七十二君或禪奕奕或禪云云
其迹不見其名可聞祇道文祖光昭舊勳方士虛誕儒書
齷齪佚后求仙誣神檢玉秦災風雨漢污編錄德未合天
或承之辱道在觀政名非從欲銘心絕巖播告羣靈

大唐開元十四年歲在景寅九月乙亥朔十二日景戌建

碑西側諸王從臣題名小字八分書

趙石墨鑄華云元宗太山銘文詞雅馴分隸道逸刻
在太山高崖不易拓王戶部堯年為彼中司理見餉一
本如獲明珠元美云余嘗登山轉天門見東二里
許穹崖造天銘書若鸞飛鳳舞于烟雲之表為之色飛
全祖望鮑崎亭碑跋云開元紀泰山銘摩崖刻之前明
俗吏更以忠孝廉節四大字鏡其上舊文為所毀者半
天下之庸妄有如此者予求得范侍郎天一閣所藏完
本豈非百朋之珍乎封禪秦漢之侈心碑雖有倣效之
言已慚愧初年之勵精矣至于
未路賀野無遺賢則其極衰也
鐵函齋書跋云明皇泰山銘鑄青帝祠後石壁方三丈
余每過其下輒摩挲不忍去商之官斯土者皆以搨須
架而架木則不可卒致遂不復強之丁亥夏五過蕪城
見葉芳杜所藏本有顧云美飛白書泰山紀銘四字大
方尺古勁在銘上思以錢叔寶濤江夜汎圖易之不可
益以白鏗又不可快快至白下門忽見此本與以所益
之數得之為之不寐者竟夕然
終以不得云美題字為恨也

山左金石志云唐元宗紀泰山銘文唐書所載不全岱
史及泰安志亦有數字不同今悉從拓本舊濟南府志
云碑下截剝落明葉彬補書百八字形似小異蓋揭者
冬月燬火之所蝕也字舊填金泥元時錯落猶有存者
見杜仁傑記今悉銷殘矣武虛谷云舊唐書禮儀志元
宗製紀泰山銘御書勒於山頂石壁之上者是也今以
其文與志參校朕宅位十有四載碑作宅帝位若涉大
川碑涉字下多謂字告字下多天字震誓九寓碑作震疊
以至岱宗碑至下多字實萬物之始為蒼生而祈福碑而
之孫羣靈之府其方處萬物之始為蒼生而祈福碑而
德碑無迺字懿爾幼孫碑爾作余刻金石碑石作記冀
後人之聽詞而見心碑無蕪字又作後之人衛我神主
碑衛作行中宗紹運舊邦惟新碑於此下多睿宗繼明
天下歸仁二句或禪亭碑亭作奕奕儒書不足碑
不足作齷齪按文之異者容所據見或有不同若銘列
祖而獨遺睿宗則下文恭已無為正以睿宗禪位為詞
若接屬中宗義便不相屬又儒書齷齪蓋指議封禪儒
生所錄故以齷齪鄙之作史都嫌其過詆儒書遂刪易
以不足當之斯不達其旨矣銘後題開元十四年叙又
作十四載年載通稱互文非如天寶元年改年為載始

有專名也
又云從封諸王羣臣題名在紀銘西側嘉靖間數人
石刻向未經人著錄故流傳絕少前明嘉靖間數人
鐫刻大字橫貫交錯唐刻遂湮蝕僅有存矣擇其可識
者有臣憲字另行有岐王臣範字下空一格有太子字
依稀有業字司空另行有王臣沐字永王臣澤字太子
清字廷王臣因字另行有王臣沐字永王臣澤字太子
置同正員外字另行有王臣正員外字另行有王臣
口置同正員外字另行有王臣正員外字另行有王臣
外置字餘不可見今以舊唐書傳紀証之憲睿宗長子
讓皇帝憲也岐王臣範者睿宗第四子本名隆範後避
元宗連名改單稱範睿宗踐祚進封岐王太子下空五
格是業字業睿宗第五子本名隆業後單名業睿宗即
位進封薛王開元八年遷太子太保是空處當作太保
薛王臣也司空外按章懷太子名守禮神龍中遺詔
進封薛王先封薛王先封薛王先封薛王先封薛王先封
司空邠字官封雖殘未全見知為守禮也據元宗紀開
元十三年二月丙子改邠州為邠州此刻於十四年作
邠字從新改為文王臣洽十三年三月邠王嗣真改名
洽即其人臣清元宗第十八男清封為壽王也延王臣

泰山志卷之五 金石

三

下殘字按元宗第二十男洞封為延王新唐書亦作洞
延王本傳作洞据石刻殘字因當從洞為定王臣沐元
宗第二十一男沐封為盛王是王字上缺文當作盛也
永王臣澤元宗第十六男澤封為永王皆以十三年封
金石刻所記與史合嗣韓王臣諤宗室世系表有嗣韓
王大僕卿諤鄭王下缺表有小鄭王房嗣王遂州刺
史璣後於明大字題名內鑽空見一臣盧毓秀名蒙古
字內存一開國李仁德名又有書門下口口事上柱
國臣李元口又有陸去泰劉崇熙劉大雅王敬之諸名
按李元口下缺字當作紘紀於十四年四月丁巳戶部侍
郎李元紘同中書門下平章事本傳及宰相表並同今
石刻有書門下口口事字正其同中書門下事時也元
紘衛已至四月可知矣
刻石又當後於此矣
右刻在山頂并額共高三丈四尺廣一丈七尺作碁局
紋大書深刻額字大二尺碑文大五六寸山崖石理此
處獨堅故全碑平坦完好唯下截為道人積薪燬于火
乾隆初邑人大學士趙國麟以舊本重摹補之字形差
小神氣亦遠不及原本碑西側從封諸王從臣題名作
數層刻之惜多為歷朝題字鑿毀殆盡嘉慶二年春署
山東按察使楊錫錢塘江鳳彝同至宿登封頂命工精拓審
陽湖楊元錫錢塘江鳳彝同至宿登封頂命工精拓審

視尙存岐王臣範咸王臣沐延王臣涇及張說尉大雅
劉敬之孫元慶等銜名殘闕數百字筆鋒犀利奕奕有
神惜佳刻不完耳東側亦多唐宋金元人題
名紛紛遍刻高與碑等趙明誠題名在焉
社首壇頌 源乾曜撰 見
文獻通攷今佚

開元十四年

東封朝覲頌 蘇頌撰 梁昇
卿八分書今佚

開元十四年

封祀之山五在中國泰嶽首之昊穹之命再集巨唐皇帝
受之臨位十四年考虞氏歲巡之義諷周王時邁之什十
月辛酉步自有洛十一月景戌帳殿齋于嶽趾淵默以清
繹思而照將紀功布度順斗承天精享也已丑宏觀軼區
宇盛儀振開闢高臨建鳳萬隊張皇以燭山上御飛龍百

神翕習以扶道國台二藩后四髦士密侍信臣高位扈封
臺列升陞不下五十以聖言冲邈瑤牒寶書誓之旨曰朕
獲守丕業恐不克駿命惟上帝儲休錫蒼生無疆之慶朕
之慶也古則祕之何哉屬寒馳迅飈露清終夕若埽若鋤
宴然而已庚寅天官次錄王制協時嚴高祖以配之嗣高
宗以陟之冕裘立珪璧序潔壘俎調鐘呂倨勾于篋簞夏
擊乎祝敵寶駢瑞兮物焜煌空薄霄兮音容與則織塵不
動和氣充塞日在于觀天爲之門揚日大光謂小天下昭
以抱戴見之卿霽郁郁紛紛喜氣烟熅當芝檢引紫熏太
紫洞而三辰接鬱蒼搖而萬歲聞自下達上俟吾君君之
來兮望如雲端兮睟聖之門至尊辛卯有事于社首以泰
圻如泰壇於穆我睿宗侑而作主奠獻嗚咽天子之孝也
僉以金匱歸勛于祖禰石礧藏美于乾坤戒威秩則司存
癸巳載天旗合大樂三陔嶠以惟抗四亞鏘而輅止朝羣
牧揆千官底邦賦數庭實華蟲辨等車馬來覲周人隨人
二王之賓戎狄蠻貊萬里重譯必拱于著執贊奉璋口口
叩叩靡敢怠違乃建雞竿代鼙鼓帝命出皇恩溥揚翼風
作解雨施舍之蕩滌之宥法罪除頽頹瀆湧洋溢周流黜
壽不崇朝而徧者與此山俱疇翳而不拔胡微而不鋪也
亦旣稱壽申命宗伯咨爾頌焉效古之刻石臣頌稽首再
拜而言曰臣聞昔在帝堯臣惟咎繇聰明之謂聖邁種之
謂德天若曰依于巨唐易姓者李王子中華崇功者唐聖

之澤德之浸也我唐祚之興昌符誕膺兩儀動六葉承皇
帝宣高祖四宗之景烈肇開元神武之明號廣矣大矣莫
有不寧罔有不俾咸一德之輔不二心之臣羣后抗詞曰
臣聞先王因天事天因地事地因名山升中于天陛下得
天之經得地之義得人之行行也者孝莫大焉兼三才以
爲政政也者仁莫大焉含萬物以爲性今三才貞萬物亨
六典平九功成官不滔獄不放至于刑清良有以也因斯
而談清明在躬志氣如神之睿者君也四國于藩四方于
宣之美者臣也有物有則君臣係乂之原所由于前設其教
于後爾往歲邦危中否天討內難陛下提三尺之劍旌閭
闔絕勾陳趨北軍正北辰然後翼翼乾乾尊尊親親立我

烝人聖考所以付天下之公器蹈汾陽之清塵唐雖舊邦
其命維新古者振兵釋旅祠土祈穀先事也我是以幸太
原祭汾雕耀金甲肅邊鄙虜馬警而不敢南向解嚴京獲
寶鼎獻宗廟成人歸而盡務東作報福京坻于是乎爰佐
五時郊天以奉時爰崇九室裕祖而敬思昭格遲遲神人
允釐無何藉三脊盛六穗不召斯至擁休之類如山則委
曷月而祕豈非享物降嘉司火也立渾同度在璿也陛下
姑謂之薄臣所未諭且管氏託齊帝王凡八十九湮淪鬱
沒孰若致美我高宗勒岱甲子正六十旰蠶葑蕤故能應
期我神武惟繼代奉業增高休鴻缺乎中何也卽先后以
權暫阻于運二宗紹復未遑厥功神闇之契不在諸子而

當聖躬固不可辭者審矣帝曰俞畏德之不稱而左輔右弼襍縉紳鴻碩之倫抱絕懷書蒸雲吐霧方集賢內殿講議前席以論之傳不云乎君子勤禮敬之至也易不云乎先王作樂豫以動也慎矣哉禮樂之爲用故執禮者具刪弊則質宜之自我變樂者理去商何害謙以爲臣二者治而三讓之制曰可始嚴鹵簿騰七萃啟禁關迴九重以聽乎鸞聲之雍雍匪疾匪徐物其有容動植讚華夷觀駢闐總搏羨漫半散出成皋踰滎波憑滑臺眺洪河遂並昆吾之墟倘佯乎大舜之澤瀕四瀆二濟入于宛徑九一三齊喬于岱惟二旬有六而頓行在莫不皤皤華皓如藿傾陽或牽以餽或捧之觴偃僕乎康莊一以伸神武之今日一

以威乾封之舊章迺餼歸之觴舉之慈且惠而與之驩
渭頡頏矧國鄒魯家洙泗乘汶野而圖記可知指泮林而頌聲不墜以周公之故將孔子之後翹然希王者之屬車聖人之清蹕則久及信宿之應巖巖所瞻宗神曰天齊王加一等于三事戶二十俱王祀環十里禁人樵報也大禋旅之數重襲成之祿撫遺叱賜之復帝曰吁夫艱難繫王業休咎牽人事况天監之殊祥也殊典也不自滿而虔鞫于位朕寶臣曰乾曜洎說有初有終時乃風欽哉汝作朕左右丞相繫汝忠益以嘉猷補袞之闕罔或怠遂宏天封煥天章象介丘而旋德陽大饗乎羣方程後代美其律聲其實墳作四而籍言七也臣頌不敏繼伯夷之直清微太

史之留滯聆金奏同百獸之舞振木鐸採萬人之詩敢陳
詩以頌曰天子聖兮天孫崇登以封兮報以功受命再惟
皇代天之賚人所載士馬山牒戈矛山沓正符山襍靈響
山答天與人合我鋪衍兮長粹清太元冊兮太一精休光
光我之慶成舜四朝而禹萬國莫之我京

案唐書崔融傳梁昇卿工八分書東封朝觀碑為時絕筆是刻在乾封元年封禪朝觀頌之西不知毀于何時舊志稱損于林燁以兩碑混而為一也

造泰山御碑記并陰 正書 孫文慶撰 見金石錄今佚

開元十四年十一月

岱岳觀修齋記 正書 在東碑南面第二層

開元十九年十一月

又一首 正書 在東碑南面第四層左讀

開元二十年二月

董靈寶題名 正書 在泰山銘東側左讀

開元二十三年七月

文曰莫州泛龍觀道士董靈寶為國投龍設醮開元二十

三年七月一日

齊州神寶寺碣 篆額 八分書 在神寶寺

開元二十四年十月

大唐齊州神寶寺之碣 口子寰纂并書

觀夫三皇五帝氏王夏殷周漢氏作淳源竭而不流澆俗
紛其方扇雖口苜將聖老氏谷神遊龍之道德西浮歎鳳

之詩書東口竟不能庇交喪拯口口馬彼物俗登茲仁壽
徒存紫氣之言終絕素王之筆曷若金口口跡十地而
孤尊寶樹應期乘四輪而廣運大雄有已見口生溺之苦
海于是虜橫寶筏而濟之大雄有已見諸子迷之朽宅于
是虜駕舟杭而出之視之以五蘊皆空明之以諸漏以盡
洎玉毫騰彩現賢力之象位金儀入口現神通之日月經
傳白馬眇閻崛以移來剎起青龍口閻浮而錯峙遂令有
國有家者得其道而四海以寧元元口口者得其門而六
塵高謝豈與夫向時之二教同日而言焉神寶寺者寶山
口面岱宗北陰岡巒口口而石壁萬尋林藪蒙龍而口口
千仞貔豹蹲踞人絕登臨虺蟒縱橫鳥通飛路粵有沙門

諱明不知何許人也禪師德隆四輩名優六通僧徒具歸
羣生宗仰晨口棘口四念經行夜宿榛口六時禮敬貔豹
枕膝禪心宗而不驚虺蟒縈身戒定澄而不亂水瓶朝滿
羽仗夜來事跡非凡故非凡測親題口記自叙因由曰明
以正光元年象運仲秋于時振錫登臨思同鸞嶺徘徊引
望想若雞口歛彈指法警此爲福地遂表請國主驅策人
神立此伽藍以靜口爲號自梁齊已來不易題榜屬隋季
經綸生人版蕩革鼎推變真俗各虛今之所存殆將半矣
至我大唐御宇重遷九鼎再修二儀四海廓清萬邦壹統
用光正道建三寶以傳燈化洽垂衣統口生于壽域適格
命天下有因廢伽藍先有額者並口電傍十時有鄉人王口

應答州縣申聞以此寺北有寶山東有神谷因改爲神寶
寺爾其寺也望魯開基臨齊作鎮堂宇宏壯樓閣岩堯砌
□□瑣階塗金碧□容有睟瑞相無違發妙彩于天金磬
奇遺于龍石手輪含字臨□綴而披網眉宇舒毫鑿壁璫
而上月寺內有石浮圖兩所各十一級舍利塔一所衆寶
無量門洞啟石戶交暉返宇鏘鏘飛檐轆轤半天鵬起
遙遙烟霧之容一地龍盤宛宛丹青之色挹朝霞之明
甚夜月之濯濯風牽則寶鐸鎗鎗日照則花盆晶晶迢迢
亭亭鬱鬱青青皓皓吁吁煥煥爛爛遠而望之炳若初日
照灼皎扶桑近而察之□似素雲靄靄度夕陽方之鴈塔
有似飛來辟以化城還疑蟬出寶瞻仰之形勝是歸依之
福因寺內先代大德僧明幹提智惠燈被無明闇僧彥休
護惜浮囊微塵不犯僧元質積行勤苦軌範僧倫僧神解
□樹論幢摧諸憍子僧宏哲持經得驗舍利猶存僧惠沖
殷念西方期心安□所造功德觸類滋多僧景淳禪戶綱
宗元門樞紐僧貞固□心宏護結志修營僧法將齟齬出
家童顏落彩三齊負笈獨標麟角之先九洛□□迴出牛
毛之外並其沐聖恩僉成道器忽崔□風急鹿苑霜飛早
謝傳燈空歸錫影現在諸大德寺主僧慧珍戒珠□月道
骨含□堤忍作衣法空成座六時禮念脇不至牀一食標
□□不再飲是慈悲父是良福田廣濟蒼生普心供養前
□維那僧惠浴標松千仞崖岸萬里吐□雲于脣吻納山

岳于心宵縱橫道門口達無礙上座僧塵外戒香紛馥有
賓頭盧之軌儀都維那僧敬祥惠劍如霜繼舍利佛之談
說僧敬崇柰苑良材橫愛河而濟羣溺僧智山祇園杞梓
做法宇而庇蒼生並騰麟俊藪矯鳳口口餘厚柱于春臺
撫定輪于秋駕口烟飛口來遊歡喜之園宴坐經行實名
和合之衆故同鑄寶碣高旌福門大唐開元神武皇帝陛
下朝宗萬國口頓八宏金鏡含七曜之輝玉燭和四時之
氣慶雲澄彩瑞日呈祥仁動上元力侔大造瀚海天山之
地盡入隄封龍庭鳥穴之鄉咸霑口化封金岱嶺刻玉僊
閭藻鏡乾坤光華日月刺史盧諱全口門有卿相家襲銀
璜強幹則不發私書清肅則遽然官燭矜孤恤寡愛士崇
賢故得詠入來口謠登至晚山在縣口令梁曰大夏幹局
貞口神情警悟風琴寫韻則瑞雉爭馴冰鏡澄清則祥鸞
自舞誠梵王之福地真釋帝之名區爾其澗戶溪沈山扉
窈窕玉林霽乳問抱朴而猶疑石壁鑿經訪嚴遵而不識
奇卉怪木如窺須達之園瑞葯僊苗似入提伽之院象王
獻菓下甘露于珠盤鳳女持花拂靈香于寶帳迦陵頻伽
之鳥百囀間關優曇鉢羅之花九光凌亂漢皋遊女對玉
洞以傾心季梁賢臣仰瓊堂而頓首庶使文殊過去憶妙
說之清塵彌勒再生見神功于貞石式鑄寶碣而爲頌云
大雄降跡葱山本元口有三界非無二門不生不滅若亡
若存遍看郡有無如我尊鴈門惠遠蜀賓羅什明公繼茲

茄藍此立俗戶易窺真門難入遁口龍象前後相及大唐
受命當宇握鏡化洽萬邦功齊七政綠圖舒卷紫雲迴映
惠日再暉薰風在詠門庭華敞房宇輪奐蓮臺畫閣危樓
飛觀竹韻宮商花然灼爛僧衆虔仰士女稱歎亭亭妙剎
灼灼精廬雕盤瞰野鏤檻凌虛珠懸日淨峰迴風口口雲
栖鳳倒井銜藻峩峩寶碣落落神軒邪山整岫苦海澄源
錦雲霞烈綬霧風翻此中何地給孤獨園

維開元廿四年歲次景子十月丁未朔五日辛亥刻
畢下缺

僧普解僧法海僧惠溪僧口口僧法口口在女德
此寺口口遷神勒之在銘紀于來代

右斷碣高六尺三寸寬四尺字三十五行行五十四字
八分書字徑寸額字徑五寸在泰山西北九十餘里
岩之陰寶山神寶寺故基篆額九寸頗端勁文字亦
整唯遇石有缺陷處即空數字應是勒時原未細加
磨碑羣生羣有作郡勇作勇入絃作入宏提封作提
皆異文若黎作粉乎作序寂作宋翽作胡警作碎飲作
飲慧作惠則猶存古法也

碑側行書心經

無年月

靈巖寺頌 李邕撰并行書
見金石錄今佚

天寶元年

靈昌郡太守邕以法有因福口口得真僧冥止神人告祥
宜或真空以悟聖或密口口以接凡口口謂之靈巖允矣真晉
宋之際有法定禪師者景城郡人也嘗行蘭若若是者歷

年禪師口勞一人逝將辭去忽有二居士建立僧坊宏宣
 佛法識者以為山神耳因夫山者土之至厚谷者墟之至
 深水者因定而清林貝葉之經衡廓蓮花之獨人存法立
 事著名揚空矧乎辟支佛牙灰骨起塔海龍王意賀金仍
 舊昔考州將厚具邑吏孔威廣口支保多借器物而送之
 仍施絹五十匹口若武口阿閣儀鳳堵波光堂大悲之修
 舍利之口口身之造禪祖之崇山口口增口口口也雲
 霞炳煥于丹霄即而察之日月照明口口口二口口客植
 之不生汎于草間穢于壠上職由律住持入慧之境口繁
 文字口筆杪于連章口廣間遺刻上座僧元景都維那僧
 口祥口主安禪或上首口空或出等永言悟入大啟津梁

咸高梯有口勝公自照仍依俗諦天長其詞曰俾彼上人

魏乎曾嶺真立福地神宮歲寺建置今古齊同磴道邈迤

霞閣聆隴其二岳寺台之國口岱之北阜蒲之要隘是人

依法口事聯聲哉傳覺以極斯萬其五大唐天寶元年歲

次壬下缺

右頌見錢唐黃司馬易所藏舊本魄力雄偉為北海得意書惜祇存上半下載已闕每行蕭標多誤不能定其

造大真武象碑并兩側題名正書

天寶六載四月

右刻在山西南麓青帝觀嘉慶丁巳夏與內閣侍讀學士雅州蔣子蒲諸人遊普照寺過此得于西廊廢圃遂命工移置殿前樹之審視碑文已磨泐過甚僅隱隱見數字及年號額鑿佛象二製甚精工兩側每刻陰文戲

泰山志卷之五 金石

花小象二作二層左側題名有曰夫人供養曰兼人趙
進超一心供養其字體皆唐刻
也碑陰為宋皇祐末禧詩刻
造舍利函記正書 在靈岩見
金石文字記今佚

天寶十一載

岱岳觀修齋醮記正書 在西碑 南面第四層

大歷七年正月

公孫杲贈諸法師詩正書 在岱嶽觀 造象記 西碑側

大歷七年五月

岱岳觀修齋醮記正書 在西碑 北面第四層

大歷八年九月

王大使等題名正書 在南山 桃源峪左讀

大歷八年十月

大歷八年王大使因拜岳與韓補闕前建安口太守同遊

張鍊師房道士卜口口記時十月十日

右刻在桃源峪北石崖上已為宋人張邦茂等題名錢
毀文從左讀字體本小占石無多宋人因從其右空處
題字起縱筆大書蓮及左方於是大歷題名盡為所掩
從筆縫中尋其影迹乃得錄其文幸磨泐者僅四字耳
泰安縣志云僅有二十字可識者蓋未審也志錄此碑
題作張鍊師題名云劉禹錫有送東嶽張鍊師詩即其
人也今驗碑同遊者實王大使為之倡而題記者張鍊
師等三人是不應以張鍊師為主矣王大歷等皆不書
名無從攷也

岱岳觀王圓題名正書 在東碑 南面第四層

大歷十四年二月

岱岳觀敬謩等題名正書 在東 碑側第二層

建中元年二月

又口偃等題名正書 在東碑南面及西碑南面第五層

建中元年

又任要等題名并詩正書 在東碑北面第三層

貞元十四年正月

靈巖功德頂佛座題名正書 在功德頂石龕佛座上

長慶元年

林放殘碑正書 在城東南放城集見舊志今佚

太和二年

舊志云城東南八十里放城集相傳為林放故里向有祠土人掘地得斷碑猶存林放問禮之本及唐太和二年十餘字

帝觀石刻在山南麓見元好問東游紀畧今佚

大中口年

修方山證明功德記正書 牟璠撰鹿繼宗書 在靈巖山頂

大中八年

修方山證明功德記鄉貢進士牟璠撰

此山前面有石龕龕有石像從彌勒佛并侍衛菩薩至神獸等計九軀按寺記云唐初有一童兒名善子十歲已下自相魏間來於此山捨身決求無上正真之理口啟首口四禮遂墮未及半虛五雲封之西去其音樂口口天風錯口畢寺緇白無不瞻聽乃鑿此山成龕立像旌之曰證明功德暨乎會昌五年毀去佛口天下大同凡有額寺五千

餘所蘭若三萬餘所麗名僧尼廿六萬七百餘人所奉驅
除略無遺子惟此龕佛像儼口微有董殘大中五年奉旨
許於舊蹤再啟精舍寺主僧從心聞於州縣起立此寺有
杭州鹽官縣人僧子儒俗姓董氏不遠江湖訪尋名跡至
六年五月七日得度既果前言口口懸誠金采裝飾方山
證明功德兼口口神及師子各二隻口金彩色手功價
口口口五十貫文施主二百餘人口口一鐫姓名口口左
其山口口在寺之良直上可四里下思人口井以口處星端
旁野口滄溟有同蓬島口龕石口有泉不口來源從細竇
泄口石盆口口口口口而已玉液金漿莫得口其甘美
口口香山口口質乎香口子儒公明山巒之口口口固敬

石之像長年冀賢劫盡而同盡自口口外胡可傾移哉
大唐大中八年四月八日鐫記

按此後有寺主僧及
捐施人姓氏不具錄

寺主僧從惠大中五年奉皇恩遠降許令漆飾舊基先度
曾改口主持口月廿八日經長清縣陳狀四月十三日門
字缺六來口六月廿日口口口度獨缺七祝口心口後口工
北臨聖堂口是此等缺六一景界夜至三更先見二僧一
僧面西而立一僧面東而缺四亡妣口身缺十先口口口
集隨月而缺六去來口口有五口口赤口大袖口衣
頭上冠笄口執笏中有一女身缺九頭口雙鬟手中執口
口老口口去缺六餘口忽然不見明口口至齊州口口口

此口祥瑞口口七月廿八日呈上刺使劉將軍遂喚入見
問其由八月一日得度九月一日入字缺四尙住會口口口
度使字缺四侍口口官字缺十上聞明勅所口口宜依口

大中八年四月廿日記

按此碑之左尚有五行隱隱有字紋裂不能辨識成文
因不具錄右刻二段在靈巖功德頂石龕佛座下正面
中刻小佛像一前後刻記小字楷書瘦勁有神書者鹿
繼宗鑄者李可言姓名與施錢人混列幾不能辨刻文
之上又多為宋人題名鑿毀

宋文藻曰是碑上鑿宋人題名五段第一段元祐三年
戊辰長清王撻第二段蘇永叔李行父庾祐之三人題
從左讀無年月第三段永叔曾遊四字第四段丁巳三
月十日而無年號由戊辰逆推之當是熙寧十年第五
段丙子仲春十四日由戊辰順數之當是紹聖三年蓋
五段同為宋時所刻首尾相距二十年也自有此五段
宋人題名後人從未有述及唐時碑記所載證明功德
之所由來及主僧從惠七姓冠笄執笏降臨之事蓋舊

刻之埋沒久矣按會昌五年八月壬午大毀佛寺復僧
尼為民事見新唐書武宗紀而毀有額寺至五千餘所
毀蘭若至三萬餘所復僧尼至廿六萬七百餘人亦可
補史所未詳至大中五年奉旨再啟精舍亦史所不書
鹽官僧人董子儒金彩裝飾雕造師子為證明中興之
大維那今考其事蹟不惟長清志乘之所遺即武林傳
述舊聞亦無有知其姓字者矣石刻縱廣一尺三寸
寬八尺從未經人推搗乾隆乙卯春益都段赤亭吳江
陸古愚先後往搗俾文藻參校兩本而詳錄之

泰山石闕題名見金石錄今佚

封禪壇殘碑陸堅八分書見金石錄今佚

岱岳天齊王靈應碑萬賓書見鄭樵通志今佚

右刻實刻類編作荀同光撰開元二十二年立按岱岳
之神唐元宗開元十三年封天齊王宋真宗大中祥符
元年加封仁聖天齊王四年詔加上天齊仁聖帝元世
祖至元二十八年加封天齊大生仁聖帝明太祖洪武
二年改稱東岳泰山之神
今唯宋勅封一碑在焉

顏真卿題名

正書 在泰山銘 側見金石錄今佚

〔金石錄云〕泰山銘側有題名三列王世貞記東封頌旁有顏魯公題名損于方元煥詩固不若苔土埋翳之尚

可洗而有也

劉難陀等題名 正書 在岱岳觀造 象記西碑側第五層

魏嘉禮等題名

正書 在岱岳觀造 象記西碑側第三層

李白泰山吟詩刻

篆書 在山上見明人 孫克宏碑刻目今佚

李白題獨秀峯三字

正書 在徂徠 三嶺

琅琊山千佛蓮造象雜記二十首

並正書

後梁

小蓬萊諸人題名

正書八分書

辛未改元

運局龔四能巡山李元英主簿顏志道縣尉陳聖微同觀

辛未改元後二日題 左讀

巡山李元英鉅鹿簿張伯揚濟陽掾張君猷同主觀張義

之遊此 左讀

巡山孫明叔法掾揚子平弟尉子章同觀暴浪癸酉六月

十三日顏志道題 左讀 八分書

壬申秋社日主簿顏志道尉揚子章同觀主張義之到是

峪水聲寒玉山色迷靄深得仁智之趣觀夕陽忘歸是日

濟北王仲文題 左讀

蘭陵東元伯與姜子正蘭思復馬濟叔韓公權張義之同

遊甲戌孟秋望日題 左讀

金石

泰山姜子正口邱翟公肅口口七月晦日

右刻六首在山南王母池北水石陰森名小蓬萊宋金元無辛未改元者唯後梁太祖開平五年辛未改元乾化至甲戌是為末帝乾化四年新縣志稱有宋元祐甲戌末元伯等題名誤也

後唐

冥福院牒

正書 在冥福寺今佚

長興四年九月

勅中書門下

行書

宣賜冥福禪院產業地土

正書字第一段

在岳廟東其地南至街北至馬司徒東至姜三郎李子蘭

為隔東南至槐樹東北至張中舍 第二段西斛斜市近

北街東面東北東北至卞二郎北至卞二郎南至官省

西至街 第三段清酒務西南至街西南一一至靈派

西至捺河岸北至路東北二至街東至酒務界牆內有霍

二口郎王廟令臨街有稅地相至霍二郎宅南至本院地

東至大鄆州街南自至西至小鄆州街 第四段寨西門

裏有街南裏裏角地一闕 第五段大寨內有地藏院所

居地基并拐子地計三畝捌分叁釐叁毫並係冥福禪院

地基 第六段大寨裏本院東菜園一坐計地玖畝大

第七段寨城東東北路菜園一坐計地叁畝大路南拐子

地一角計地壹畝大東至翟家南至道西至成家北至南

宮地 第八段本院莊上菜園一坐計地伍畝大四面自

至 第九段宣賜冥福禪院稅戶口在昭告亭東有莊計

地壹拾貳頃大東至沙河南至張中舍西至王官人北至

成三郎內有短頭地身在北邊西北角東北角至韓五郎
趙二伯莊南一段肆拾肆畝大東至張八郎南自至西至
張二郎北自至雍家莊後有地一段南至張教書西至古
道北至東北角二自至 第十段泰山下本院所止地基
南北長陸拾叁步闊伍拾陸步陸分及殿後拐子地東西
長肆拾壹步口分闊伍步陸分約地壹拾伍畝大並係賜
到院地基地凡十段字十四行行三 右付冥福禪院准
此 長興四年九月二十三日正書一行字徑六分 樞密
使檢校太傅平章事駙馬都尉趙蓋有押鈐 樞密使檢校
傅平章事范蓋有押鈐 樞密使檢校太傅平章事范空 封
也 中書門下牒冥福禪院凡四行字徑一寸正書而
也

四字正書印一印徑二寸文曰 賜紫法僧實相主僧智順
中書門下之印即通行大篆文
監院從幽字徑五分 額曰特賜冥福禪院地土之記字

宋詔遷治號嶽祠也
右刻在冥福寺西墀下高五尺一寸廣二尺七寸碑字
上下兩層上層刻是牒共二十二行真草大小相間其
日樞密使檢校太傅平章駙馬都尉趙日樞密使檢校
犬傅平章事范蓋趙延壽范延光也二人有押押皆有
印顧氏金石文字記謂此牒無押蓋押為印文所亂視
之未審耳下層刻偽齊時印照乃奉符縣崇法院僧海
岩狀稱給付印押執照簿尉皆有押茲院在後唐號冥
福至偽齊易名崇法嗣後仍稱為冥福今改名資福寺
是碑為重修
此寺時亡去

僧智璋等功德頂題名正書 在靈巖
山頂石龕佛座

清泰三年
三郎廟殘石正書 在
山南麓

泰山志卷之五 金石

按文獻通考後唐長興三年詔以泰山三郎為雄威將軍宋大中祥符元年加封炳靈公是碑有三郎等字或即其廟碑與姑附于此

後晉

冥福院經幢

正書 在城內資福寺

天福二年三月 六年正月

右幢高六七尺上下兩層作八面書之下層却是經首周環讀之猶未盡也一刻金剛經題天福二年三月姓氏殘闕一刻婆羅門僧云云題天福六年歲次辛丑正月辛酉朔二十五日乙酉檢校太保使持節密州諸軍事行密州刺史兼御史大夫上柱國清河郡開國侯關反作上層蓋因舊幢斷仆後復樹立而倒置之故章句有問矣

澶州建柰河將軍堂記

正書額 正書 在城西南隅廟內

天福六年三月

太嶽柰河將軍廟堂石記銘

鄉貢進士劉光度撰

祝史福如書

詩云太山巖巖惟魯所瞻標羣嶽之首隱眾靈之府靈者神也神生於無神之神陰陽不測而為神日月照耀而為明無神之神者至道也道德經云杳杳冥冥於中有精恍恍忽忽於中有物此之謂也天福六年三月十七日新澶州岳社頭郭肇等皆以金門貢藝玉署呈才風雲雜作於二龍奮躍素高於雙驥副社頭郭肇口清涵珠海鑒澈冰潭貯茂異以盈懷抱才實而鑠志因乘暇豫同慕勝遊而彼南原共觀橐舸飲酒酣暢而相與言胡不聞賈誼云生之也若浮生死之也若休莊周云生之也道行死之也物

化人修短分定豈不在乎神明哉遂乃拱志修崇歸心祀享
結集岳社化彼邑人不暮月間惣四十戶至天福元年三
月十日社衆西自新州東之太岳遠備牢醴克置羞薦無
愧叨僭惟竭至誠但有遺曠庶幾增建竊見宮宇炳煥峯
巒迴合尊神衆列侍者星繁唯奈河口元非靈廟是以歷
覽林藪履蹈河壖東望則天之壇西臨鬼仙之洞疊障重
巖倚其後飛雲流水枕其前得此一方便爲殊勝是以肇
畫砂礫□□□□任便裁基隨宜剏跡召公輸於魯甸招
匠石於郢郊截岨嶮之花松斷新甫之挺柏奇材異石窮
神役思以蘊崇碧瓦銅塼盡心畢力以駢集口運斤秉斫
爭工不異于雷震劇木飛繩競巧可同于電捷天福三年
五月十日建就堂一所三間四下椽週迴行牆二十四堵
門樓一所悉以粉飾藻繪秀麗精華取金碧於十洲運丹
青三島香竇綺井返植蓮荷畫棟瑯梁高橫蟠螭翠欄朱
網亭亭而日麗九光復道重階落落而露凝五色天福五
年三月九日迎入將軍夫人真形兩座廝兒妮子兩人夜
叉一對郭肇等命以巫者告厥成功醜酒焚香虔誠啟仰
忻然應變但覺醜顏迴風遶壇實謂神降此則天意人事
聖道合符體乎元元不可窮紀光度學輪鍾會才謝邱遲
堅讓不從輒敢承請是以疑元扣寂口簡口豪力課短懷
用旌刊飾銘曰

瞻彼奈河泉瀉清清噫彼逝人魂飛冥冥善惡斯作禍福

隨情應業受分靡跡厥靈將軍英靈祠堂窈窕一氣散化
萬神應兆事有克彰物無不照輔贊天孫宗室崑崙優游
高士放曠清人預構陰德思振芳塵物景代謝事跡相仍
成此廟貌永司其津

天福六年歲次辛丑三月辛酉朔十七日己丑

謹具錄元立社紉首及頭副樣勾當人姓名 天福元年

充紉首石徽趙勳 次充頭副樣陶凝趙勳 次充頭副

樣王光庭程罕李訓李嗣 次充頭副樣張翰傅贊趙勳

聶召 次充頭副樣郭召邵超奇賓邵規 口口人趙勳

顏溫李近嗣邵進劉鐸聶召王進孟景張翰張素畢佺韓

勳王朗王輅趙作揚挺宋安許儒程罕宋頽馬唐李溫李

暉 召聶銖胡瓊王豐劉祚劉則孫罕傅贊石徽王廷口

劉 尙遂聶進張太王勳李訓 勾當副樣邵規奇賓

口口副樣郭肇邵超陶凝陳唐馬溫宋美成贊王福王知

訓岳規 都料匠尉遲練夏侯知遠鑄 范彥釗李口同

造

右碑高四尺九寸廣二尺六寸字徑七分額字二寸並
正書額曰瀘州建柰河將軍堂記字二十四行行五十
十五字在城西南廟內

碑陰有熙寧間題名
全祖望鮎埼亭題跋云濟南七十二泉皆發於太山之
麓獨未聞所云柰河者石晉天福二年有太山柰河將
軍碑鄉貢進士劉元之文也其文不工書亦拙柰河
之神而曰將軍又有夫人真不典之祀也以五代石墨
之希故

存之

朱文藻曰碑中字多別體靈作靈真作真炳煥作炳煥
畢力作畢力役作役迎作迎嗣作嗣翰作翰皆隨意增

減不合六書王翰應是王翰楊捷應是楊捷劉則應是劉則或以形似致譌其生若浮其死若休語出莊子今引賈誼語而浮字下衍生字不暮月間依文義當是暮也漢書酈其傳握齧好荷禮是以荷為苛此則以苛為荷也運丹青三島丹青下當有於字應業受分碑實是分字聶氏金石攷釋作受戮似未確也碑稱立社糾首糾同糾謂斂錢之首也同預會建廟為同社郭肇是社首也頭副樣勾當人是當時在廟經理之名目猶言正副也其名朔見此碑額題澶州建柰河將軍堂序又稱新澶州五代周時曹州謂之澶州此廟在泰安而云澶州建所未詳也廟稱將軍不詳為何神所掌何事今據碑序首言生死陰陽之理而銘詞又有輔贊天孫之語博物志云泰山一日天孫言為天帝之孫也將軍殆亦輔佐泰山之神與高里神祠相為左右今釋氏功德書有過柰河橋之事其源殆出於此顧亭林考古錄亦云漆河水在高里山之左有橋跨之曰漆河橋世傳人死魂不得過而曰柰何此與漢高帝云柏人者迫於人也之意同至其真形有夫人有廝兒妮子有夜叉一對後世神廟象設之盛亦濫觴於此矣

青州臨淄縣口生童子正書 資福寺 在

天福七年

真福院新寫藏經碑并陰正書 額 正書 在真福院今佚

天福八年五月

東岳真福禪院新寫藏經之碑

朝議大夫行殿中侍御史柱國周元休撰

述夫元黃判而清濁分三才叙而萬彙育散乎元素簡易之體猶存降口中庸澆口之風益扇雖羣分類聚上智下愚靡不惡其死而愛其生口其得而口乎喪緬維盤古爰及當今咸欲致身于常樂之鄉立名于無疆之域而嗜慾窒性好尚由心口苦海而口迴蹈迷途而繼踵竟致惡而必得愛而必忘浩浩洋洋猶百川之滔滔過者莫可得而

言也至於用慈儉□□□體沖虛而為質駕□□鸞之侶
俯仰八宏吟□御氣之流逍遙□合或丹邱暫別或羽化
俄歸亦不能忘情於生死之源絕跡于□夷之境降茲以
往何足道哉泊乎西域誕靈耀列星而應瑞漢廷入夢挺
金質以呈祥法被寰中□超象外遠究天人之際廣開方
使之門現無生而不死之□□有相□無形之域修正真
之□□□□能□□□□之至明閭室皆曉觸類斯長無
幽不通元化普洽而不窮虛谷有聲而必應□矣哉總萬
法而為方即絕跡出塵無如佛者夫□道也大慈廣運宏
濟無方闢□□□□元關□啟導一乘之教覺路難登寂
滅虛空真如綿邈窈冥莫測識智難量是知翫長空者必

假假巨浪者須資于舟楫將欲以言觀法以

心窺心窺門究□□□□是者即莫□乎經夫其要
也如鳥□□一音次則偈于四句變卷石為千峯之秀導
勺水為萬流之源于是貝葉緹紉流行斯廣龍宮寶藏□
□攸繁莫不指示迷方津梁□□使□□珠者必求罔象
涉麗水者果獲祥金披文則萬象皆呈得意則一言以蔽
能宏是者其維釋門之達士哉即今經藏主隱公是其人
也公生于鎮州靈壽縣俗姓裴氏法名志隱出家于奉恩
寺受戒于光化初幼無重心長有佛性名山勝境靡不經
遊先止于咀嶽山光化寺修行二十餘載剃度三十餘人
遠邇傾依緇俗瞻仰是院先有主者僧順公本貫定州深

澤縣人也俗姓李氏法名智順出家於本州開元寺受業於法華院後因巡禮遂至山門與先院主僧道言相繼住持六十餘載剝度二十餘人條崇院寺口德佛事並已周圓濮陽化召得施主李彥章等特建鐘樓經藏雖斤斧丹青煥乎畢備而經文典誥咸且闕諸遂乃堅請主持假其緣化既從請託遂果成莫不慕修信心資乎敏手堅比移山之志勤同覆置之功僅越十年始就前願凡寫藏內經律論及聖賢傳記等共五千四百八十卷並新成得精詳永用緘藏是圖悠久今院主僧行口供感典座僧行隱並禪林擢秀口永澄波護戒珠而地傳祖印而非關墮鵲三千世界不染六塵八萬門皆歸一念身居五濁蓮花生于淤泥心燃百燈太陽入于闕室住持口境炳煥釋宗况方嶽之中岱宗爲首地臨齊魯境歷淮沂玉几金牀宛畱勝跡天門日觀下瞰長空爰屬盛明印期封禪方今千年啟運四境無塵緇徒雖磨于法門野老咸知其帝力府口太師相公勳高社稷口列山河下車而比戶咸蘇出令而連營盡肅論兵玉帳謀深起翦之流禮土金臺價重鄒枚之選故得時康俗阜氣淑年和成此莊嚴口口風教遂釋子歸依之願契如來付屬之言得不備以良因記之貞石元休功虧力學敏謝生知幸見託于斯口實懷口於染翰口揚功德迺述銘云浩浩浮生茫茫曠劫惡積禍胎福生善業覺路難尋愛河易涉瞻彼

歸一念身居五濁蓮花生于淤泥心燃百燈太陽入于闕室住持口境炳煥釋宗况方嶽之中岱宗爲首地臨齊魯境歷淮沂玉几金牀宛畱勝跡天門日觀下瞰長空爰屬盛明印期封禪方今千年啟運四境無塵緇徒雖磨于法門野老咸知其帝力府口太師相公勳高社稷口列山河下車而比戶咸蘇出令而連營盡肅論兵玉帳謀深起翦之流禮土金臺價重鄒枚之選故得時康俗阜氣淑年和成此莊嚴口口風教遂釋子歸依之願契如來付屬之言得不備以良因記之貞石元休功虧力學敏謝生知幸見託于斯口實懷口於染翰口揚功德迺述銘云浩浩浮生茫茫曠劫惡積禍胎福生善業覺路難尋愛河易涉瞻彼

壽山志卷之五
波瀾□□舟楫爰昔大士百億化身不類□境□塵
演茲妙法□□蒸民門關覺路指示津妙旨幽深微言
祕奧窅窅靈源茫茫元造孰究真宗孰探法寶欲究欲探
必資經誥猶歎經典列聖徽猷一音□□百□斯流雕金
鏤玉貝葉緹綉將求佛性捨此何求偉哉達士成此至功
□乎寶藏宛若龍宮生雖有岸法本無□天長地久永播
真風 大晉天福八年歲次癸卯五月戊寅朔十五日壬
辰建

碑陰

興邦佐命忠亮功臣泰寧軍節度充沂等處州觀察處置
等使檢校太師同中書門下平章事使持節都督兗州諸

軍事行兗州刺史武威郡開國公食邑□□戶食實封三
百戶□□潘信 節度行軍司馬銀青光祿大夫檢校戶
部尚書兼御史大夫輕車都尉田文進 節度副使金紫
光祿大夫檢校尚書左僕射兼御史大夫上柱國冀從實
節度判官朝議郎檢校尚書金部郎中兼侍御史賜紫
金魚袋王瑄 觀察判官將仕郎檢校尚書職方員外郎
兼侍御史賜紫金魚袋劉彥融 節度掌書記將仕郎試
大理司直兼侍御史賜緋魚袋申光遜 觀察支使將仕
郎試大理評事兼監察御史朱谿 節度推官將仕郎試
大理評事李光□ 觀察推官將仕郎試祕書郎閻翥
節度巡官儒林郎試大理評事兼監察御史李□□

登仕郎前守太子通事舍人守錄事參軍張鋪 將仕郎
 守戶曹參軍于用章 將仕郎守法曹參軍李汎 文林
 郎試大理評事守乾封縣令張口 修職郎守乾封縣主
 簿賈全翼 前泰寧軍節度副使光祿大夫檢校司空兼
 御史大夫上柱國安定縣開國子食邑五百戶席全威
 院主僧行仙師翁元起置院和尚法號從幽俗姓刁氏
 藏經功德主僧志隱 先師本貫鎮州靈壽縣人本州奉
 恩寺主僧道恭 藏經周備刊石標題同學行口等二十
 餘人 前攝龔邱縣主簿張口口 都料作頭白景男知
 信知遠

石碑連額高九尺二寸廣三尺二寸額字徑二寸文字
 徑六分二十九行行七十餘字並正書字多剝泐碑陰

更漫漶難讀舊在冥福寺天王殿乾隆壬子泰安守
 徐大榕改修寺宇遂與勅牒一碑並為工人所毀
 搃持咒幢 釋歸仁正書 在高里山

天福九年

右幢高六尺五寸作八面刻磨泐殆盡後書東京同力
 會人某某鄆州同力會人某某兗州同力會人某某濮
 州同力會人某某內有天平軍節度押衙前齊州都商
 稅使銀青光祿大夫檢校太子賓客殿中侍御史雲騎
 尉韓知訓泰寧軍押衙銀青光祿大夫檢校太子賓客
 兼殿中侍御史武騎尉劉口口節度押衙前岱嶽鎮使
 口口節度副使前察固鎮副兵馬使充岱嶽鎮都虞候
 王訓滑州別駕孫近徽前亳州別駕劉崇友前攝齊州
 司馬趙宏嗣又無官名者數十人官名漫漶不可辨識
 者數人亦可以見當時風尚日岱嶽鎮者今治本宋乾
 封縣城故址創于開寶五年後晉時猶為岱嶽鎮其
 岱嶽鎮使及岱嶽鎮都虞候官名則舊志所未詳也
 普安社眾人刻經石幢 正書 冥福寺 在

無年月

佛頂尊勝陀羅尼經幢 正書

右幢四石疊成每石八面字徑寸類柳誠懸無年月在冥福寺姑與前幢並附于此

泰山志卷第十五

泰山志卷第十五 佛頂尊勝陀羅尼經幢 正書 右幢四石疊成每石八面字徑寸類柳誠懸無年月在冥福寺姑與前幢並附于此

25083

